

清正

兩浙名賢錄

十八



兩浙名賢錄卷之三十五目次

清正

宋二

吏部尚書俞若晦烈

刑部尚書趙履常汝談

大理寺少卿徐純中瑄

太常寺少卿朱仲文質

轉運判官康子厚植

父仲穎附

中書舍人莫粹中子純

國子司業陳和仲墳子蒙附

司封郎中史南叔彌鞏

嘉興守陳茂叔穎子疇附

兵部侍郎章君寶鑑弟鑄子祖邵附

司農卿呂景陽秉南

校書郎方子高山京

太常寺少卿王處一萬

侍御史蔣伯見峴

陳錫疇元龜

禮部侍郎徐公望儼夫

福建司理毛君玉蘭

秘閣修撰陳子公均

教授徐受之天祐

承宣使趙待用汝擢

監登聞鼓院章升道樵

戶部侍郎商翬仲飛卿

元

監察御史王叔善餘慶

方希元全翁

明一

刑部主事屠任

御史柴叔貞履

子廷傑附

監察御史王進德敏

吏部員外郎張仲高昇

懷安縣知縣胡孟通節

福建按察使陶厘仲

四川兵備僉事王文璉琦

韶州府知府湛用和禮

翰林院侍講王希範洪

王晉叔升

子瑱附

兵部尚書柴叔輿車

大理寺卿徐復陽初

饒州府知府葉履道砥

揚州府知府李貞

應天府府尹陳俊民俊

太常寺正卿姚友直

四川按察司僉事謝惟壽忱

監察御史茅維揚

四川按察司僉事王彥修緒

廣西左布政使胡宗愚智

思南府知府求尚圭琰

按察司照磨張友讓禎遜

江西按察司副使周元靜安

兵部郎中李伯偉山如子德附

四川按察司僉事高汝晦暉

刑部員外郎徐仲規昂

吏部侍郎范理

山東按察司副使童守正真

山西叅政褚克卿讓

廣東左布政使韓伯陽陽

都察院右僉都御史魯希文穆子崇志附

提學僉事邵德温玉子莊附

蘓州府通判陳履信信

吏部尚書魏仲房驥兄驥子完附

陝西按察使呂好隆昌

吏部左侍郎俞積之山附子誥

監察御史潘貴模楷附弟英

刑部主事田廷玉玳

按察司僉事王調之鼎附子鋈

廣東巡撫李宗楷棠

江浦縣知縣嚴允迪廸

陝西按察司僉事陳永言詠

刑部尚書樊廷璧瑩

廣東叅政胡廷慎謚附子惠

應天府通判林孟陽春

兩浙名賢錄卷三十五目次終

兩浙名賢錄卷之三十五

東海徐象梅仲和氏謨

滄陽賀應旂士以氏閱

兼清正 燕巖 蘇繼 至 韓 林 桂 墨 博 又 蕭 奉 宗 聖 文 至 波

宋二 共二十七人

吏部侍郎俞若晦烈

俞烈字若晦臨安人祖徹與張九成凌景夏齊名列少

警敏淳熙八年試禮部第一授太學錄遷博士光宗卽

位轉對請酌咸平元祐之制日輪講讀官內直以備訪

問進秘書郎出守嘉興上供及額卽止不肯增緡錢以受最賞召爲司封郎尋除中書舍人論駁不撓忤韓侂胄論去嘉定初起知慶元府移鎮江撫輯流移曲盡恩意召權禮部侍郎兼中書舍人不以往事懲於勲戚濫恩貂璫伏罰官掖夤緣干請多格不行尋除吏部侍郎兼侍讀進讀通鑑至唐斜封墨勅又讀孝宗聖政至郊祀不買象事拱而言以致諷戒號盤隱居士有盤隱詩編掖垣制草奏議北征等集

刑部尚書趙履常汝談

趙汝談字履常太宗八世孫居餘杭登淳熙十一年進士佐趙汝愚定大策汝愚欲驟以詞掖處之力辭去已而汝愚去國與弟汝讜力上疏乞留汝愚斬侂胄聞者吐舌遂罹黨禍被斥依祖墓以居者累年益肆力學問除太社令時侂胄用事熾甚汝談痛憤一日登壇讀祝大呼侂胄及陳自強名自強不能堪它日指汝談曰末座白誓者何人汝談不爲動召試館職補正字是時吳曦叛上下束手或請就以曦爲王其人造汝談汝談詰之曰孰欲王曦者可斬其人面發赤不能對而去出知

嘉興府與郡將王介志合改知無為軍與光州守柴中行安豐守陸峻俱稱循吏改湖北提舉常平賑荒盡力知温州改知外宗正作詩勉其族屬皆望風而化寧宗崩以哀痛得疾賀理宗表力寓勸戒陳碩曰此諫書也端平更化以禮部郎召兼學士院樞直制詞時朝議出師汝談反覆言不可輕戰而和尤非計既而三京收復雖前言用兵不便者亦喜而汝談獨有憂色未既洛師敗朝論始服其先見累官給事中權刑部尚書卒汝談天資絕人沉思高識自少至老無一日去書為文章有

西漢風篤於倫誼而忘讐怨御史王益祥嘗劾之後汝談官其鄉益祥媿不敢見汝談乃數過之相得惟甚所著有易詩書論語孟子周禮禮記荀子莊子通鑑杜詩註

大理少卿徐純中瑄

徐瑄字純中定之子賀光宗卽位表補將仕郎試中法科由評事遷朝奉大夫大理少卿會濟邸獄起史彌遠囑其附會賊殺無辜且啖以美官瑄曰殺人以苟富貴吾不為也守正不從遂削官謫道州又徙象州竟死於

貶所。端平改元，侍御史王遂請加褒卹，詔復原官。贈集英殿學士官其二子，郡立勸忠坊於第左。

太常少卿朱仲文質

朱質字仲文，義烏人。登紹熙四年進士第二人。廷對，春秋大義以復讐爲說，孝宗聞之大喜，累官著作郎兼侍左郎官。開禧初，金使入見，倨慢，上書乞斬之。虜聞之，縮頸尋擢右正言，左司諫，皆兼侍講。時韓侂胄議用兵，質以爲不可及，師出無功，而侂胄更欲議和，質又以爲戰勝而和尤不足恃，况議和於不勝虜，有以玩我矣。侂胄大怒，卽日移太常少卿兼樞吏部侍郎。嘉定再和，遂以謫去。用累赦，復官。予祠，差知道州。未及上而卒。積階朝散大夫。有易說舉要奏請詩文雜稿。

轉運判官康子厚植

父仲穎附

康植字子厚，金華人。父仲穎仕至尚書吏部郎中。植用世科，登嘉定進士，授主簿。三遷爲武安軍節度掌書記，以需次之暇，執經於徐僑之門者三年。端平更化，侍僑赴京，喬行簡欲處以職事，植亟赴書記任，置制使史嵩之團結漁舟防江，植持不可，嵩之怒，對移江陵酒官，請

奉祠徑歸。未幾除國子正。改通直郎。輪對言事。抗直忤
 執政意。差通判廣德軍。救荒有法。陞知本軍。以治最聞。
 召知大宗正丞。遷兵部郎官。出為浙西提點刑獄公事。
 劾奏平江守臣史宅之治郡無狀。嵩之宅之兄弟也。時
 為丞相。并及之。疏入。理宗震怒。欲重罪之。杜丞相範時
 在樞府。為之極諫。謂憲臣言事既不中。又加之罪。如天
 下公議何。理宗尋悟。乃徙宅之隆興。而植提刑福建。改
 知寧國府。兼權江南東路提舉茶鹽義倉。奏免和糴行
 經界法。除都官郎中。出知吉州。改福建轉運判官。赴闕
 奏事。卒於途。歷階朝奉郎。

中書舍人莫粹中子純

莫子純字粹中山陰人以恩補官銓試及禮部奏名俱
 第一賜進士第簽書平江軍節度判官聽公事除秘書
 省正字歷遷中書舍人蘓師旦本平江筆吏韓侂胄任
 為腹心氣燄薰炙求進者爭趨其門一日遇子純於都
 堂趨前執禮甚恭子純不為禮師旦已深恨之會師旦
 遷官子純又執不可侂胄怒出子純知贛州加右文殿
 修撰改知江州不赴又改温州提舉太平興國宮嘉定

八年卒。子純性資聰悟，博聞強記，立朝之節，始終不渝。士論歸之。

國子司業陳和仲墳

子蒙附

陳墳字和仲，鄞人。大叔父平與同郡，樓鑰友善。死，鑰哭之，墳纔四歲，出揖如成人。鑰指盤中銀杏，使屬對，墳應聲曰：金桃問何所據，以杜詩鸚鵡啄金桃對鑰，竦然曰：亡友不死矣。以禮部第一，登嘉定進士第，調黃州教授。喪父毀瘠，考古禮行之，忽歎曰：俗學不足學，乃師事楊簡，攻苦食淡，晝夜不怠，免喪。史彌遠當國，謂之曰：省元

魁數千人，狀元魁百人，而恩數踰等，盍令省元初授堂除教授，當自甥始。墳謝曰：廟堂之議甚盛，自墳始得無嫌乎。徑部注處州教授，以去士論高之，與郡守高似孫不合，歸奉其母，召爲太學錄，轉對稱旨，遷太學博士，改太常，獨爲袁燮謚議，餘皆閣筆，歎曰：幽厲雖百世不改，謚有美惡，豈諛墓比哉。李全在楚州，有異志，墳以書告彌遠，痛加警悔，以回羣心。蚤正典刑，以肅權綱，大明黜陟，以飭政體，不納未幾，賈貴妃入內，又言乞去君側之蠱，媚以正主德，從天下之公論，以新庶政，彌遠召墳問

曰吾甥殆好名邪。頃曰求士於三代之下，惟恐其不好名，力丐去。添差通判嘉興府，彌遠死，召爲樞密院編修官，入對，首言天下之安危在宰相。南渡以來，屢失事機，使祖宗之仇不報，中原之土不復者，宰相非其人也。次言內廷當嚴宦官之禁，外廷當嚴臺諫之選。於是宦者陳洵陰中之，而監察御史王定劾頃，出知常州，改衢州。時土寇十日發際坑，遵江山縣而東，頃獲謀者，卽遣人致牛酒諭之曰：汝不爲良民而爲劫盜，不事耒耜而弄甲兵，今享汝牛酒，冀汝改業，否則殺無赦。於是自首者

日以百數，獻器械者，重酬之，遂以潰散。歷遷浙西提點刑獄，知安吉州。俞垓與丞相李宗勉連姻，恃勢贖貨，頃親按之，弓手戴福以獲潘丙功，爲副尉，宗勉倚之爲腹心，盜橫貪害，頃至，福聞風而去，貽書宗勉曰：頃治福所以報丞相也。傳聞實走丞相所賢輔弼，不宜有此。宗勉答書曰：福罪貫盈，非君不能治。宗勉雖不才，不敢庇姦凶，惟君留意。及獲福，皆欲殺之。頃曰：若是則刑濫矣。乃加墨徇於市，囚之園土，召爲吏部侍郎，遷國子司業。諸生相慶得師，出知溫州，未上，以言罷。頃家居，以泉石自

娛四方學者踵至、輕財急義、一言之出、終身可復、子蒙年十八、上書萬言論國事、吳子良竒之、妻以女、爲太府寺主簿、入對、極言賈似道缺失、爲淮東總領、似道誣以貪污、貶建昌軍簿、錄其家、惟青氊耳、未幾、放便、以刑部侍郎召、不起、卒。

司封郎中史南叔彌鞏

史彌鞏字叔南、彌遠從弟也、好學強記、紹熙四年入太學、升上舍、時彌遠柄國、寄理不獲、試淹抑十載、嘉定十年始登進士第、鄂帥李臺知彌鞏持論不阿、辟谷幕府、事壽昌戍卒失律、欲盡誅之、乃請誅倡者一人、軍心感服、改知溧水縣、嘉熙元年、都城火、彌鞏應詔上書、謂修省之未至者有五、又言濟邸之寃、足以干和氣而召災異、蒙蔽把握、良有以也、出提點江東刑獄、歲旱、饒信南康三郡大侵、乃釐戶爲五、甲乙以等第振粟、丙爲自給、丁余而戊濟、全活者口一百一十四萬有奇、休寧有淮民三十餘輩、搃戈劫財、逮捕法曹、以不傷人論罪、彌鞏曰、持兵爲盜、貸之是滋盜也、推情重者戮數人、一道以寧、饒州兵籍溢數、供億不計、請汰冗兵、令下、營門大譟。

乃呼諸校謂曰。汰不當。許自陳。敢譁者斬。咸叩頭請罪。諸營帖然。廩給亦大省。召為司封郎中。以兄子嵩之入相。引嫌丐祠。遂以直文華閣。知婺州。致政里居。絕口不道時事。卒年八十。真德秀嘗曰。史南叔不登宗衮之門者三十年。未仕。則為其寄理。已仕。則為其排擯。嚼然不污。有如此。

嘉興守陳茂叔頴 子疇附

陳頴字茂叔。壽昌人。少游太學。有聲。登嘉定十年進士第。宦轍所至。輒以最聞。時相開邊。薦參謀官。知政事。頴抗論政府。非賞功之地。命遂寢。出守嘉興。以大理卿召。言者阻之。且逮吏。稽在任。出納摘其疵。無所得。私歎服之。後其子疇為大理評事。會時相以意嫉邊守。下之理。必欲死之。頴謂疇曰。殺人。以苟容。如天理何。疇奉法如頴教。竟以忤歸。頴笑曰。是足為吾子矣。自嘉興歸。闢一室。題曰志齋。十五年。竟不復仕。

兵部侍郎章君寶鑑 弟鑄子祖邵附

章鑑字君寶。昌化人。登嘉定癸未進士。調温州永嘉簿。歷官國子司業。兼侍講。進太府卿。以言免歸。端平更化。

首上封事，復召爲講官，兼掌內外制。時相專政，極論其蠹國，且乞罷職。嘗上疏云：進人不可太銳，聽言不可不察。又言：流民失業，而有司不以告下情，未易通也。除兵部侍郎，兼給事中，進文華閣待制，積階通奉大夫，爵錢塘縣開國伯，食邑八百戶。以病丐歸，卒。贈光祿大夫，鑑天資穎悟，爲文立就，爲人忠直淳厚，事有切於時者，必爲上精言之。時相疾其正論，每誅以禍福，鑑不爲動。深爲理宗所知，特見親禮，自號藝翁。弟鏞，登嘉定庚辰進士，與兄齊名。歷官吏部郎官，子祖邵，官承議郎，知浦江。嘗捐家帑以全邑民之命，至今言其事者爲之感泣。

司農卿呂景陽秉南

呂秉南，字景陽，新昌人。紹定中進士，尉崇安，調寧國法曹，獄無冤滯，校勘涇邑版籍，別疆理，清賦稅，公私便之。改吉州法曹，數治疑獄，有聲。遷淮東路檢法官，考舉合格，改都昌令，盜攻陷州郡，秉南據湖死守，邑賴以完。政成，入與輪對，以正君心，明道術，爲急務，語極剴切。遷大理寺丞，無何，拜司農卿。時政歸權臣，每除吏，必示恩意。秉南屢遷，無私謝，由是以傲坐免。卽日渡江歸，所著有

南明稿十二卷

校書郎方子高山京

方山京字子高，慈谿人。幼孤，旅泊外家，固窮力學。言行修謹。景定三年，進士第一人。或病其制策過簡，勉令益數語。山京正色曰：「既徹上覽矣，吾誰欺！」除簽書平江軍節度判官。五年秋，衡文天府，適彗見，山京舉以策士。極言內帑之私、公田之擾，及指摘內庭缺失，同事縮頸辭舌，請稍諱忌。山京披襟當之，遂被劾罷歸。貧甚，無以爲家。親故爲築室，繼廩。山京處之泰然，無悶也。度宗登極，詔以前官起。山京移知建康軍，不行。尋除秘書省正字。乞宮祠，進校書郎。差主僊都觀，得疾，遂不起。朝野皆惋惜之。

太常少卿王處一萬

王萬字處一，浦江人。家貧而勵志於學。登嘉定十六年進士第，添差通判揚州。以母老，辭。萬少忠抗，有大志，究心當世急務。極知邊防要害。三年，授樞密院編修官。嘉熙初，兼權屯田郎官，輪對稱旨。差知台州，至郡，惟蔬食布衣。終日坐堂皇上，事至立斷。吏無所售，其欺多改業。

散去民亦化之不復訟上下肅然丁歲侵盡力拯之民無飢死者但言萬名莫不舉手加額曰吾父母也尋乞祠去三年遷屯田員外郎兼編修官轉尚書右郎官尋兼崇政殿說書四年擢監察御史首論刑部尚書史宅之故相之子昔常弄權不當復玷從班上命宰相再三諭旨迄不奉詔上不得已出宅之知平江府史嵩之自江上董師入相衆莫敢言萬首論之會議相之事已決疏入除大理少卿萬即日東還召赴行在奏事出爲福建提點刑獄加直煥章閣四川宣諭司叅議官皆辭俄乞休致特轉朝奉郎守太常少卿致仕卒年四十八及嵩之罷相人方交論其非上思萬先見謂萬立朝蹇諤古之遺直爲郡庶平古之遺愛特贈集英殿修撰予錢五千緡田五百畝以贍給其家謚忠惠

侍御史蔣伯見峴

蔣峴字伯見奉化人性剛不阿慶元二年進士第授太常掌故改武康令有治聲調唼縣燭幽摘姦民以爲神以薦拜右諫議大夫事有不可必廷辨面折端平初除殿中侍御史兼侍講史嵩之欲開督府與樞密李宗勉

論不合私請劾之。峴曰：宗勉無過，臺諫乃耳目官，豈受私請邪？峴嘗劾鄭良臣，上曰：良臣，嵩之所舉，峴對曰：公論不容，臣不知有嵩之也。嵩之後，以書罪蔡範、袁肅等。峴曰：此有用之才，不可誣也。因自警曰：勿欺心，勿負主。勿求田，勿問舍，號四勿居士。官至寶章閣學士，卒。

陳錫疇元龜

陳元龜，字錫疇，平陽人。讀書，迎解落筆輒驚人。以六典貢漕闈，升太學，擢嘉熙進士第，教授瀘州。歷江淮諸司幹官。開慶初，提轄左帑，時太學六士扣闥，時相怒其攻已，欲去之。將以元龜爲諫官，諷以意。元龜正色曰：臺諫天子之耳目，不可以市私恩。直士國家之元氣，不可以報私憤。學校公論之自出，奈何摧折之乎？遂被劾，未幾除主管官誥院，委買江東限田。元龜曰：熙寧間海內無事，王安石以新法騷動，釀成中天不忍言之變。普天之下，莫非王土，未聞瘠子以肥父而家可爲也。因是又劾去。道得疾，及門而卒。自號蒼巖，有蒼巖雜著八十卷。

禮部侍郎徐公望儼夫

徐儼夫，字公望，平陽人。高才博學，以文章鳴當世。淳祐

辛丑廷試第一。歷官館閣。以忤丁大全拂衣歸。終其用。事杜門不出家。貧并日而食。日抱膝高吟。聲出金石。或勉其抑已謝過。儼夫笑而不答。景定更化。起爲禮部侍郎。卒。

福州司理毛君玉蘭

毛蘭字君玉。松陽人。資性冲澹。簡默莊重。官福州司理。時宰相趙汝禠之黨曰林冕者有罪下獄。使人夜懷金私之。蘭正色不受。復賄當道者以威怵之。不動。卒坐冕以法。汝禠聞而歎曰。蘭持法如此。何有於廷尉乎。後召蘭不果行。累官二十載。歷敘凡九考。居最。卒止承直郎。未能脫選。時咸以劉向比之。

秘閣修撰陳子公均

陳均字子公。平陽人。歷知東陽麗水西安三縣。以最除大理丞。出爲江東提刑。改廣東。徭寇犯邊。漕攝帥幕。少年邀功。縱殺囚數十。平民於獄。均曰。治兵帥職。獄吾職也。自行審覈。盡釋之。帥不悅。媒孽於臺。竟罷去。久之起知贛州。兼江西提刑。以潔滌汚。以慈易暴。咸淳初。除檢正。會賈似道以平章奉母居湖濱。欲以堂印自隨。均爭。

日堂印無出城之理。由是免官。未幾以秘閣修撰樞密都承旨致仕。卒年八十一。均少受教於真德秀。故剛正有守。立身行政。務盡其職。雖屢黜。亦不顧也。

教授徐受之天祐

徐天祐字受之。山陰人。以父相恩。爲將仕郎。銓試詞賦第一。尉歸安。時年尚少。卽以吏事稱。嘗出郊。吏具供帳甚飾。天祐詰所從出。吏以例對。天祐曰。費出於官。則犯法於民。則重擾。例安可用。盡却之。貴人居邑者。將囑事。出謂人曰。吾見尉自不敢有所請。中進士第。爲大州教授。日與諸生講經義。聽者感發。德祐二年。以國庫書監召。不赴。退歸城南。杜門讀書。四方學者至。越必進謁。天祐高冠大帶。議論卓卓。見者以爲儀刑。

承宣使趙待用汝擢

趙汝擢字待用。奉化人。庶謹不苟。取官至承宣使。嘉定五年。南安西溪洞尹彥輝跳梁。汝擢挺身諭之。彥輝頓首泣謝曰。天賜公活我郡。賴以平。後被命經理斬春事。樽節有方。雖府庫克實。未嘗一開燕瀕行。有牙契錢七十緡。吏自例當得之。斥不受。教官葉逢以母夫人年高。

爲勸汝擢。自指其頰曰。鄙陋相。豈更望溫飽耶。後死無以爲歛。朝廷聞之。給喪葬費。以表貞白。封奉化郡公。監登聞鼓院。方升道樵。以平於。嘉命。歷。海州。高郵。山陽。方樵。字升道。昌化人。嘉定元年進士。歷海州高郵山陽教官。習知海微事。再上時相書。力陳李全必叛。劉瑄不可任重。後全作亂。郡官多被其害。獨樵率諸生盛服坐堂上。賊至。歛刃而退。後宰吳縣。通判常州。皆以廉公著稱。以薦召監登聞鼓院。尋以疾丐歸。卒。樵學宗伊洛。議論通暢。識達時務。所著書有集曾子十八篇章氏家訓七卷。補註春秋繁露十八卷。注補古文苑二十卷。行於世。

戶部侍郎商鞏仲飛卿

商飛卿字鞏仲。台州臨海人。淳熙初。由太學登進士第。仕無爲。軍教授。累官至工部郎官。時韓侂胄柄國。氣焰薰灼。飛卿既至。未嘗輒一造。請踰月。卽丐去。提舉福建路常平茶鹽事。擢監察御史。以言事忤侂胄。罷爲奉常。請外。以秘閣修撰。爲荆湖南路轉運判官。改司農卿。總領江東淮西軍馬錢糧。金陵故有帥漕治所。合戎騎二。

帥留鑰內侍號六司宴飲餽遺費動萬計飛卿以身率
儉節縮浮苛糧饑時歛散稍稍以裕聞就擢戶部侍郎
侂胄將舉師嘗問餉計豐約飛卿以實告比調遣浩繁
不克支屬有旨俾飛卿軍前傳宣撫勞值金兵大至幾
不免以憂卒家貧不克葬人始服其清

元 共二人

監察御史王叔善餘慶

王餘慶字叔善金華人受業許謙之門嘗游京師有畚
僧官爲統制者勢焰烜赫得其一言官爵可立致或以
其名聞僧召之拒曰吾學將以伸吾正道寧有屈身而
道可伸耶縉紳悉服其操行至正初入經筵爲檢討官
累拜監察御史政聲著稱後使廣東詢問疾苦惠政爲
多

方希玄全翁

方全翁字希玄鄞人溫厚誠篤博學力行志不仕元已
而方國珍據有明州致書以宗人稱欲強起爲輔全翁
歷敘世次由莆來不敢附籍且謂大明真天子出懇詞
勸之奉圖歸順國珍不從遂與之絕號避庵以自明其

志居鄉以齒德見推守令至輒賓禮之車從及門以政事相訪多所裨益終身澹泊自守以壽終

明一 共五十四人

刑部主事屠任

屠任，曠人家，貧力學，善詩文，兼精篆隸。洪武間，任蕭縣訓導，遷河南武陵知縣。在任九年，一毫不苟，取有獻瓜果者，曰：「此苞苴之漸也，遂却之。」永樂中，遷刑部主事，卒於官。昇櫬歸葬，惟篋書束帛而已。

御史柴叔貞履

子廷傑附

柴履，字叔貞，鄞人。應洪武二十七年鄉貢，授監察御史。立朝正色，不畏權勢。嘗劾折太宰之過，巡按河南時，道經通州，卽發倉以賑民飢，全活者萬計。上怒，謫令交

趾尋悟，召還，改北京河南道御史。名震京師，會中風卒。子傑，字廷俊，中順天乙卯鄉試，行已端方。計偕上京師，聞舟人夜泣，欲投水死。傑問故，知爲官租所迫，卽捐路資使償之。明年下第歸，復遇前舟人，遂與載夜，乃飾其妻進謝。傑正色叱去之。授定陶令，值大水蝗災，民輸租不足，當道謂其拙於催科，遂下考。法當左遷，以憂去。後

竟不起

監察御史王進德敏

王敏字進德寧海人氣剛不與人款狎讀書至忘寢食家貧甚或飲食不時則啜菽飲水怡然若飫粱肉人非其類雖欲飲食之不能也牀褥稍溫軟輒弃去獨卧木榻上曰吾身當適四方甘苦未可知以太學生分教忻州暇日與邊將習騎射邊將奇其材而苦其介於常所燕會處密置美姬伺其醉鑰之而去既覺身自破壁取旣馬乘之而還諸將驚謝懿文皇太子一日謂太史

宋漁曰世道日漓人其無古若者乎漁以敏對太子

動容稱歎曰何異魯男子也嘗督運舟川峽悍急同行者多捨舟登陸敏曰王事君命也死生天命也祇君命以俟天命何以陸為且舟失累人已獨安乎後他舟覆溺甚眾陸行者皆獲譴敏獨不坐遷監察御史

吏部員外郎張仲高昇

張昇字仲高杭州人弱冠有才識推擇為郡吏即以清謹稱守以下咸禮遇之勤視簿書取嚴一介諸為姦利者皆敬憚昇賢聲蔚起洪武間謁選超授吏部員外郎

清正 卷之三十五
夫志堅貞終始無玷及卒。上察其廉特給驛舟遣內
臣送柩還鄉誠異數也。祭酒李時勉誌其墓。

懷安縣知縣胡孟通節

胡節字孟通慈谿人由順天鄉試舉人授懷安知縣爲
一時廉能首稱值外艱歸行李蕭然邑人感泣欲贖金
不能強乃建卻金亭於西禪驛之渡口自恨勿克終養
廬墓而卒。

福建按察使陶垕仲

陶垕仲寧波之鄞人洪武初以國子生擢御史彈擊不
避權勢。上雅愛重之陞福建按察使時福建多滯獄
吏夤緣爲姦垕仲至治賊吏數十人盡革其宿弊又興
學勸士撫卹軍民俸祿雖厚自奉極薄有餘悉以賑貧
者。是時布政使薛大方貪暴自恣垕仲劾之大方有詞
逮垕仲至京事既白大方得罪詔垕仲還官閩人迎拜
爲之語曰陶令復來天有眼薛公不去地無皮卒於官
四川兵備僉事王文璉琦

王琦字文璉錢塘人永樂甲午舉於鄉試禮部乙榜授
汝州學正擢河南道監察御史廉明勤慎風裁凜然斷

獄不爲刻削虛心聽理務盡其情所平反死者幾七十人陟山西提學僉事精考校敦行實不徒以文藝取士士習蒸蒸改觀憂去服闋改四川兵備僉事川故多盜琦威行令明盜賊聞風聲皆斂迹去尋乞致仕歸琦歷官三十年清苦潔白守嚴一介家居貧甚衣食常不給郡守胡濬欲餉之懼其不受列狀於朝有詔賜百金琦固以無功辭竟寒餓以死飯食不具一時藩臬長倡義卹之始克斂

韶州府知府湛用和禮

湛禮字用和錢塘人永樂甲申進士授內江縣知縣陞大理評事再遷至韶州府知府韶歲貢滕而產於南海禮爲疏於朝得免貢嘗遣隸卒至樂昌督稅法外需求無已令械繫以來禮下教曰暴橫殃民法之所禁令能不以府役故屈法貸之其賢可知矣由是府役至縣皆斂戢不敢肆甲乙爭田禮斷歸乙甲復誣訴藩司知其僞命禮按致之禮慰遣令去約五日乃來辨析竟亦不加罪也其寬厚類如此清白自持始終無替及引年歸貧乏幾不能自存

翰林院侍講王希範洪

王洪字希範，仁和人。舉洪武三十年進士，授行人。陞給事中，以文學遷翰林院檢討，進修撰，預修永樂大典，爲副總裁，進侍講，主考禮闈。時胡文穆秉筆修史，位在洪右，每事輒咨之。及文穆有所請，洪輒不聽。至欲載其家乘，瑞應之徵，洪力言。上前以爲不可取，信天下來世。胡深怨之。左官禮部主事，無何卒。洪少英雋，有軼才，與解縉、王璉、王偁、王達善，號東南五才子。名重一時，居官耿介忠亮，文章氣節，表表時輩。仕未通顯，而爲時宰所擠。士論惜之。史官鄭叔美曰：王子才高乎一世，而行幾乎古人，特以負氣敢言，爲衆所忌，時以爲實錄。

王晉叔升

子瑱附

王升字晉叔，德清人。子瑱爲平涼知縣，升寄書云：本家德清之役已辦，兩圖黃冊里長及歸安甲首皆不擾而辦里長不赴京倉，此甚良法也。正擬安靖幾時，十二月間本縣又定新市弓馬，分管十二都，但辦什物勾促車人，至今不得安息，所費亦不少也。今我老景侵尋，倘朝廷容侍親，則上章求歸，父子相見，以盡餘年，若宛轉仕

途則相見無日矣。人說有分俸之例，不審有否。如得分
祿以養，亦足爲榮。若彼處關支，則不必也。凡事清心潔
已，以廉自守，食貧處儉，儒者之常。慎勿以富貴爲念。古
人云：貧乏不能存，此是好消息。正當以此言爲受用也。
治民以仁慈爲心，報國以忠勤爲本。處已當以廉敬，學
業更須勉力。暇日卽以性理之書及羣經留玩，自然所
思無邪，更須熟讀新律，自然守法不惑。飲酒當以康節
先生爲範，不可縱恣。忠定之事，律許則行，不可干其紀
也。此後倘有的便，可買附子一二枚，用椒一二斤起稅。
而來餘物，非所覲也。此書附之。御史臺勾管宇文桂爲
吏，搜得其書，以聞。太祖嘉歎，下詔褒美，賚白金百兩，
絹十疋，附子五枚，椒五斤。仍令有司除本戶雜役，以旌
異之。

兵部尚書柴叔輿車

柴車，字叔輿，錢塘人。爲人清慎，有節槩。永樂間，由舉人
再轉至兵部員外郎。從文皇帝北征還，遷江西參政。
時營造事嚴，勅車入閩取材，道經廣信。太守與車有舊，
餽蜜一甕，車疑其重，發視之，皆白金。笑曰：此所謂故人

知君君不知故人卒拒不納以事左官復入爲職方郎中遷岳州知府勸農視學公暇則周行田野督民耕桑時時進諸生講論德義三年郡內大治復召入爲職方郎中宣德五年擢本部右侍郎已而進左屬西鄙不靖廷議以車幹敏命協贊陝西軍務先是虜寇涼州副總兵劉廣喪師失律蔽不以奏更以捷聞妄要功賞車至發其罪上嘉車忠誠賜金織衣乃逮治廣岷州土官后能家人冒功陞賞車疏罷革在軍中疏凡數十上切中時弊同列咸不喜而車持論益堅於是上察車孤忠徇國益大賢之遣使宴勞錫賚甚厚進兵部尚書卒於京邸賜祭葬給驛以歸其喪

大理卿徐復陽初

徐初字復陽會稽人自幼務精思力踐之學領鄉薦教授濰州久之徵爲給事中仁廟改元首疏治道十事皆見嘉納宣德初漢庶人高煦反勸上親征翼贊有功賜臧獲四人英國公張輔朝會失儀初劾其跋扈無人臣禮上雖曲宥輔而心嘉其直擢大理卿持法務平恕中官阮某守遼東失利按罪當死者三十餘人初

奏誅首惡餘無濫及工部侍郎羅汝敬巡撫陝西坐事黜免遇赦吏部輒復其官言者劾以爲黨罪應死初曰是特失覆奏耳吏部因得釋嘗與寺丞楊復論事不合被劾下獄太史奏大理星不見上特復其官星乃見正統初乞歸又十年聞乘輿北狩一時悲憤卒初生平忠誠孝友內外一致而剛廉節槩尤爲縉紳所推

饒州府知府葉履道砥

葉砥字履道蕭山人少有學行洪武初舉進士除定襄縣丞坐累謫涼州日杜門力學處之裕如曰吾無媿於心足矣更號坦齋又號尋樂作賦以見志士大夫謫居者多宗之建文元年詔求賢才羣臣交薦召爲翰林院編修永樂初坐修史書靖難事多微詞被逮籍其家惟薄田樊廬圖書數篋而已事白仍與史職尋改考功郎中尚書蹇義任以藻鑑人才仁廟出東宮以砥爲侍講職無弗舉久之引年求去不許乃自言於吏部曰砥老矣猶叨祿在朝人將謂何上若不棄願得一小郡牧民庶報効萬一吏部以聞卽拜饒州知府饒有磁窰銅冶而丁調復等他郡砥言於當路減四之一諸所利

病悉爲興革刑清訟簡日賦詩自適年八十卒於官士民巷哭罷市著書數十卷孫冕舉進士官至副都御史自有傳

揚州府知府李貞

李貞海寧人洪武中補邑庠生建文元年赴京條具用兵方略上嘉其忠義光祿司賜燕授湖廣道監察御史未幾靖難兵至歸隱於臨平山中成祖登極謫玉田縣爲民宣宗立雅知其名召知揚州府特與勅諭旌其忠直服職三載章累百上民被其澤考績入覲以疾乞歸謝還勅諭上曰知府俱無勅與爾示子孫及歸家徒壁立持正以終

應天府尹陳俊民俊

陳俊字俊民東陽人登永樂乙未進士除監察御史巡撫南畿劾賊吏革宿弊郡邑肅然累官應天府尹以嚴峻繩下吏有舞文者卽杖殺之處同僚不阿以私嘗曰吾不能自立清流然隨波汨泥亦不爲也未幾卒於官貧無以殮士論服其廉

太常卿姚友直

姚友直，蕭山人，洪武中進士，授中書舍人，改翰林侍書。永樂初，斬獻王、滕王，皆以皇孫年少，未之國。上以爲輔導，宜用正人，拜司經局洗馬，進左春坊左庶子，授二王經，匡扶以禮，不激不阿，兩府皆嚴重之。仁宗卽位，滕王始建國雲南，上欲使友直終相王，遂除雲南布政司右叅政，領滕府長史事。宣宗卽位，將郊祀，召爲太常卿，友直歷事四朝，剛介，庶慎以結主知，方期大用，而遽以疾卒，朝野惜之。

四川按察僉事謝惟壽忱

謝忱，字惟壽，永康人。登永樂壬辰進士，授監察御史。遇事敢言，不避權貴。九爲巡按，詰姦禁暴，無所假借。人稱謝閭王。漢府謀不軌，庶得其實，以聞，命勦之，賜反屬男女四人，因忤尚書蹇義，陞四川按察司僉事。歲歉，民多抵法，忱閱之，爲求可生之途，適地方多虎患，下教曰：「有得虎皮三者，免一死，人爭捕之。於是虎患息，而民命以全。卒於官，歸葬之日，行李蕭然，士民感歎，有爲之泣下。」

監察御史茅維揚惟楊

茅維揚，字惟楊，慈谿人。資性峭深，有智計。登永樂乙未

進士初拜行在廣西道監察御史臺中奏疏及諸道讞獄當否皆出裁擇擢四川僉事轉河南副使四川按察使所至皆有廉名歸田之日囊無羨金邑人錢源以詩美之曰山中此日賦歸來共說清風似寇萊四十二年簪解豸曾無寸地起樓臺至今以爲美談

四川按察僉事王彥修緒

王彥修名緒以字行鄞人永樂甲申進士授工科給事中累上封事多所俞納勅撫安廣西福建兩省鋤強植弱得勞來安集之體轉四川按察司僉事使節所臨奸豪屏息有爲京朝官者居家不律陰持當路短長莫敢誰何竟奏置之法彥修敷歷中外餘三十年惟以廉慎自持身沒家無餘資長於諷詠有懶顛集若干卷

廣西左布政胡宗愚智

胡智字宗愚會稽人永樂中舉進士拜監察御史掌院顧佐深器之謂可屬大事已而出按部多所平反中貴人某怙寵觸法連引齊魯楚蜀數郡智奉詔往訊一鞠得其情擢福建按察司副使墨吏望風解綬遷廣西按察使龍州與交趾思郎州連歲交兵爭地智定以公議

交人不敢復爭。宣廟特加賞賚，進左布政使，異政尤多。景泰初，乞歸，杜門謝客，守令鮮窺其面，居地苦隘，守欲以閒曠地益之，辭不受。

思南府知府求尚珪琰

求琰字尚珪，新昌人，性穎敏，好學，涉獵經史。永樂間，以貢授九江通判，在官滿兩考，一以公廉自持，時勅造廬山廟，出帑金萬餘，琰用其半，餘悉封還於朝，用薦擢貴州思南府知府，清撻愈勵，嘗於宅傍種棗一林，謂子孫曰：吾以木奴千頭遺汝矣。入覲卒於京。

福建按察司照磨張友讓禎遜

張禎遜字友讓，會稽人，性剛正，清介，公於嫉惡，讀書嚴義利之辨，嘗曰：我私淑孟軻氏，人稱爲張孟子。永樂中，舉賢良方正，授福建按察司照磨，持已慎密，克修其職，數與上官辯時政得失，言論侃侃，不少詭隨，上官嫉之，不得行其志，友讓卽引年返初服，欣然着角巾，歸。一時詞林諸名人競爲詩文以高其行。

江西按察副使周元靜安

周安字元靜，仁和人，永樂中以國子生授刑部主事，陞

郎中安精聽讞慎刑法既履官卽遷處外舍使志慮清
曠務得獄情以是人樂輸誠徃無冤繫擢江西按察司
副使矢志清白斤斤職守歷官二十餘年家無尺寸之
增士論以爲難

兵部郎中李伯偉山如

子德附

李山如字伯偉鄞人永樂間以稅戶人才授鴻臚序班
積資陞兵部郎中屢奉使命嘗同石亨紀功大同風采
壁立忤尚書陳汝言致仕歸後先歷官四十餘年清苦
一節孝友天至非奉母不御酒肉貧寒不改韋布比歸

抱書甕牖間讀之環堵數椽躬任井臼之勞時人稱爲
搗穀郎中塵生甌釜養殮不能自給恩詔歲給月食米
五石進階朝列大夫及卒有司襄葬事子德字克明讀
書能詩文以市鬻糊口貧不能具稿鄉人憐而頌之

四川按察司僉事高汝晦暉

高暉字汝晦臨海人永樂甲申進士累官按察司僉事
生平潔廉好義自爲諸生時道逢遺金輒拾置墻隙中
俟其人還之未嘗開視也官四川民有烏桓霑益部者
訟田繫獄更數吏不能決暉至廉得其實立爲斷之後

謝政歸。其人以黃金厩馬爲報。暉悉拒不受。邊夷感其德。爲構郤金亭。以彰其廉。暉未老乞休。野服蔬食。意豁如也。所著有復庵集。讀易日課。藏于家。

刑部員外徐仲規。昂。樂甲申。進士。累官。對察。同。會。在。徐昂。字仲規。錢塘人。永樂初。由舉人授兵部司務。陞刑部員外郎。昂謹愿。無他技能。獨斤斤以廉隅自守。有武士謝某者。暮夜懷金來饋。昂謝曰。君以暮夜饋金。豈不聞四知可畏乎。堅却之。謝慚退。無何昂致仕。過姑蘇。病卒。貧無以殮。謝聞之。爲具棺衾。遺之人。謂昂介特。謝生長者。清節高義。兩無媿云。

吏部侍郎范理

范理。天台人。進士。釋褐。知江陵縣事。有循良聲。時楊文定溥在內閣。其子來自石首。州縣官饋遺甚勤。理獨不爲禮。溥聞而異之。後。庶知其賢。卽薦。知德安府。再擢貴州左布政使。或勸理宜致書謝。理曰。宰相爲朝廷用人。非私於理也。何謝爲。及聞溥卒。乃祭而哭之。以謝知己。說者以爲兩賢。理官終吏部侍郎。家無半椽寸土之增。服食粗糲。如貧生人。尤以爲難。

山東按察副使童守正真

童真字守正仁和人永樂中由鄉貢拜監察御史巡按四川忠誠端慤風紀振揚爲政不求近名而孜孜奉公惟知自靖擢山東按察司副使食正三品俸秩旣滿待次天官當事者諷求一見真不徃又使人至其邸真托疾偃卧不與交一言遂徙官廣東真卽拂衣歸質索單鮮識者高之

山西叅政褚克卿讓

褚讓字克卿仁和人幼警敏力學登永樂甲申進士授禮部祠祭司主事歷吏部文選員外郎濬介特立遇人餽遺輒厲聲曰若謂天下無關西漢子耶凡諸權貴造請一槩峻絕當事者寢不能平出爲山西叅政未幾乞閑卒於家

廣東左布政使韓伯陽陽

韓陽字伯陽山陰人起家鄉貢司訓蘓松二郡教士有法轉丹陽教諭以太常卿姚友直薦升南京監察御史論奏不避權要嘗劾同官王復及內官袁誠不軌事卒置於法禮部尚書楊溥薦陽學行可師表一方乃授湖

廣督學僉事士類向化如吳中時擢江西按察副使慮
 囚多所平反以殊績超擢廣東左布政使尋請致仕陽
 孝友天至母病躬嘗後漉性剛正疾惡當路有過亦面
 斥之不肯一假借卒以此與郡守交惡家居留心著述
 有思庵稿二十卷

右僉都御史魯希文穆

子崇志附

魯穆字希文天台人永樂丙戌進士拜福建道監察御
 史執法無私時太宗巡幸北京仁宗監國穆屢上

封事以敢言稱陞福建按察司僉事摧抑豪強無所顧
 避時楊文敏執政家人有犯者亦不少貸民因目之曰

魯鐵面文敏以為賢特薦於宣廟召拜都察院右僉

都御史命捕蝗於大名諸郡還京以疾卒遣官諭祭給

傳歸其喪穆為人剛方薦介始終不渝歷仕中外二十

年被服如寒素卒之日殆無以為殮同朝卿士咸賻助

之穆初被薦入院工部尚書吳中見其蕭然助以器用

穆悉却之及卒中復具棺衾歛焉以穆之行可重也子

崇志官南京太僕寺少卿

提學僉事邵德溫玉

子莊附

邵玉字德溫，鄆人。舉宣德十年鄉試，授汝州學正。秩滿，陞南寧及河間府學教授。九年，最績，轉順天府學。用薦，擢雲南按察司僉事，提督學校。已乃以足疾納祿而歸。玉性至孝，痛母早喪，卽宦輒萬里，必將父以養。其教士先嚴義利之辨，以身爲範。在汝州歲飢，民多孳死，輒捐俸煮粥以活餓者。嘗三典文範，在山東宿傳舍，逢囊金來謁者，矢天却之。在山西懲前事，豫作誓神詩以自見。比在江西，得人尤多，而嚴潔之衷，始終可對天。日嘗有鬻首飾者，至其家，直可百金，妻取而玩之，輒謂曰：汝欲之乎？使婦飾百金爲之。夫者難乎其爲庶矣。卒以清約終其身。子莊舉進士，仕終按察副使。

蘓州府通判陳履信信

陳信字履信，仁和人。少以修謹推擇爲吏，益務守廉。所服食家自給之。宣德間，以薦擢大理評事，改南京西城兵馬副指揮。陞蘓州府通判，却例獻慎官箴，清捺益勵督餉之京部，民爭獻白金爲贖。信悉拒却，事竣乞歸田里。道經吳門，前之餽金者復來獻贖，信一無所受。蘓人杜瓊贈詩云：南還依舊一青氈，又却吳民餽贖錢。縱使

此○生○貧○到○骨○只○留○清○白○與○人○傳○至○今○人○能○誦○之○

吏部尚書魏仲房驥

見騏子完附

魏驥字仲房錢塘人登永樂三年鄉試授松江府學訓導汲汲成就人才諸生讀書學官或夜携茶粥勞問務令以真知實踐爲務人人皆感激自奮滿九載諸生楊珙等詣闕乞留獻陵監國令還教三年召修永樂大典陞太常博士歷吏部員外郎進南京太常寺少卿正統初陞吏部侍郎時宦官王振怙寵而驕每出雖部堂尊官亦歛興避驥遇獨不避朝士皆吊之驥曰即使我得罪死然能抑權貴植大體亦奚憾也明日振果訴於

上御便殿召驥入

上曰爾有罪知乎驥曰臣竊

祿久得罪天地祖宗朝廷甚多願

陛下明正之上

曰此書生談勿言第思昨日曾得罪孰誰否驥曰若昨日臣嘗遇奄振揖而過未得罪也上曰何不避之驥

慷慨曰臣備位六卿而避奄人臣誠不足惜如朝廷名

器何上曰爾不畏振乎驥曰臣知畏朝廷耳何知畏

振上改容曰爾言是也溫旨諭之尋陞南京吏部

尚書景泰元年年七十七致仕驥嘗至京師大學士陳

循驥所取士也。謁驥曰：先生雖位冢宰，未嘗得立朝，願少待。驥曰：君爲輔臣，宜爲天下進賢才，不得私一座主意，稍不悅，循亦媿其剛方類此。茂陵復位，進榮祿大夫，家居餘二十年，布袍糠食，不別治生，端厚祗慎，簡約。庶靜，顧徑直，好別白，君子小人，權貴多不悅。性好吟咏，矢口適情，不求雕飾，自有雋永味。旣耄年，事其兄騏，愈恭謹。成化間，監察御史梁防疏驥有德有壽，請如漢故事，優禮，特遣行人存問，賜羊酒，有司加粢月三石，久之，驥病，遺書子完，勿以墳墓累鄉里，已有司得請，如例葬。祭完以遺言力辭，驥身不勝衣，言不出口，清德雅望，海內達尊。卒年九十八，謚文靖，兄騏以進士官終刑部主事，時稱聯璧。

陝西按察使呂好隆昌

子議附

呂昌字好隆，新昌人。舉進士，授御史，屢言時政得失，監收京倉糧，剔剗蝨耗，民皆便之。遷福建按察司僉事，事有切於軍民者，銳志勇爲。大盜嘯聚山谷間，昌率兵深入，反覆開諭，皆感服散去。遷江西按察副使，聽訟明決。臨川令嘗被誣，昌爲白之，間以私饋來謝，昌拒之曰：汝

以我執法爲徇情邪其人媿去中貴葉鎮守橫甚其奴
白日殺人市中昌捕得論死會淮邸責民子錢甚急昌
視其券久入息多者卽焚之葉乃謾語激怒王王疏奏
昌侮宗室事下御史御史素賢昌抗章訟之事乃白再
遷陝西按察使值邊備方亟民困供輸昌屢疏便宜十
餘事上悉嘉納陝爲漢唐故都其謠俗喜伉壯巨族
司千戶貲雄一方怙勢殺人昌至聲寃者數十百人司
懼要當路以書抵昌昌按其事有驗卽上狀逮繫斃之
獄中於是直聲震天下然遭迴不徙者數年疾且革乃
召其子議議至而昌卒篋無遺金僚家將以公錢贖忽
見夢於議呼而語之曰若父爲吏三十年未嘗私一錢
乃今欲以遺骨爲利邪議覺而痛泣且日卽奉覲行所
著有耻齋集

吏部左侍郎俞積之山

子誥附

俞山字積之秀水人領永樂癸卯鄉薦以祖母年高不
忍遠違宣德庚戌復會試中教官選或沮之山曰吾親
老需祿養秩崇卑非所計也授崑山訓導歷郟府伴讀
正統己巳以藩邸舊學擢鴻臚少卿進吏部左侍郎佐

銓一以古道自處。凡所薦擢。不求人知。有請謁者。輒正色拒之。子弟乘間問其故。山曰。用賢朝廷事。而可市私恩邪。臺諫有持正者。以言事取疾於權倖。山為曲折調護。後相繼顯用。景泰初。議迎復之禮。同列頗有難者。山獨奮曰。鑾輿復。然後人心悅。而天下安。况天倫所係之至重邪。極力爭之。事乃克濟。朝廷知山清慎。賞賚有加。且作歲寒圖。題詩贈之。以寓褒美之意。有以易儲請者。山密諫。不聽。退而憂曰。禍機自此始矣。乃引疾求歸。進太子少傅。囊橐蕭然。家居。日用至假。貸以給。為文據經。

史詩歌清麗典則。善大篆。工墨梅。而常晦其迹。所著有梅庄集。子誥。歷工科給事中。終建康府知府。

監察御史潘貴模楷 從弟英附

潘楷字貴模。餘姚人。正統初。舉明經。除仁和訓導。擢監察御史。坐劾逆豎王振。左遷通州學正。振敗。復召為御史。氣節益勵。尋致仕南歸。落魄無業。即飢寒迫身。濱死未嘗少挫其節。從弟英字時彥。以進士拜南臺御史。與同官范霖。楊永。劾奏都御史周銓。銓自經當路者。坐英等以死。范楊二御史日事本霖。永無與英。英爭曰。英實

同疏義不獨生。會有訟其事者，得減死戍邊。而英戍遼陽。景泰元年，詔復英等官。而英已死，世咸惜之。

刑部主事田廷玉

田珰字廷玉，奉化人。自少警敏，家貧力學。正統八年，進

士，授刑部主事。持法不阿，門無私謁。推謙詳明，而濟之

以恕。所案無冤者。尚書魏源多其才，每遇疑事，必以委

珰。珰盡心訊鞫，以勤勞致疾，疾且革，有指揮坐重律，以

白金五百兩賄之，求予輕比。珰閉門不納，曰：吾病且死，

得無媿於心足矣。忍以五百金虧平生乎。無何竟卒，家

無一錢之畜。自司寇而下，同官與素所交游者，皆致賻

始克棺歛焉。

按察僉事王調之

子鏗附

王鼎字調之，南京工部尚書來之弟也。正統中舉明經，

授本縣儒學訓導。以薦陞監察御史，執法堅正，不為權

貴所撓。巡按山西，有知縣郭某者，貪而善賂。鼎瀕行，當

路交口薦郭，鼎固心異焉。及臨縣，郭倍道遠迎，承奉周

至，愈益疑之。因摘發其奸，罷其官。民歡呼動地。代還陞

江西按察司僉事。鼎廉名素著，下車之日，賍吏聞風解

綬未幾以憂去服闋改廣東時流賊剽掠四境騷然鼎歸其妻子期以盡瘁國事涉險阻觸瘴厲一不避所得俸資節口自食而以其餘繕治器械一日出巡爲賊所得昇至寨中時有二王僉事一爲吳人頗貪而多藏賊誤喜以爲可以媒貨其中一人識之曰此浙江王僉事清官也。不可犯。遂輿送二十里拜謝而去。賊旣平鼎以年老乞歸。都御史韓雍時鎮兩廣素知鼎廉。出白金百兩爲贖。鼎固辭不獲。比至中途。因僉事張瓚反之。封識如故。雍爲之歎息。仲子鏗登進士官大理副善於辭翰。惜早世。

廣西巡撫李宗楷棠

李棠字宗楷。縉雲人。登宣德庚戌進士第。授刑部主事。歷郎中。勤慎廉明。獄無留滯。秩滿當遷。權閹王振怒其不附已。深抑之。或諷棠謁振以謝。棠怫然曰。官可不。做名節不可壞。卒不往。振死。超遷本部右侍郎。巡撫廣右。威惠並著。徭人畏服。土官黃琰殺嫡自立。棠與總兵武毅收琰置獄論死。時憲廟在東宮。景泰帝欲易之。立巳子。琰希旨建言。羣臣與者各進美職。陞琰都督。毅

以事降謫，棠遂致仕歸。初棠過梅嶺時，誓不將一物過嶺。比南歸，閱衣篋中，香草一束，笑曰：「此非廣中物邪？」取投水中，惟自携一杖，曰：「此吾左右手也。」留之歸老菊莊，絕迹城市。天順十四年二月卒，遣官論祭，命有司治葬，謚清敏。

江浦縣知縣嚴允迪

嚴迪，字允迪，餘姚人。漢子陵四十五世孫也。通易春秋，二經，補邑博士弟子員，貢入太學，屢試首六館之士。宣德五年，出知江浦。江浦邇留都，號難治，迪一以長者化導之。比屋欣戴，在任九年，以最聞。時執政者素知迪於成均，奏迪為可大用，已得旨矣。會宣廟升遐，部覆遂寢。正統初入覲，懇疏乞歸，竟得以前。旨晉大理寺少卿，致仕。迪歸，囊唯圖書數卷而已。家仍茅茨，不蔽風雨。妻子恒有飢色。論者謂不媿高賢之裔。

陝西按察僉事陳永言詠

陳詠，字永言，餘姚人。幼從父戍於居庸。正統間第進士，拜南臺御史，敢言不為身計。時英廟北狩，邸王監國，進中興十四事，尤指切。將臣失事誤國者，願甘心以

謝天下又抗言亡徙長陵衛卒徙卽有變以故得不徙靖遠伯王驥有寵而專詠劾解其兵柄師討鄧茂七之黨勅詠監軍無一卒犯令者寇平降璽書旌之出爲陝西按察司僉事母疾嘗糞母死詠亦以哀毀卒年纔三十有六囊無一錢同官棺歛之耿清惠九疇歸其喪薦紳道奠者相望王尚書竑祭詠而亡其楮竑曰可無用也公生平不取一錢死安受此楮爲其信重於名卿大夫如此

刑部尚書樊廷璧瑩

樊瑩字廷璧常山人天順八年進士爲御史巡兩淮豪有力者憚瑩清介莫敢撓阻條上清軍事宜行之著令又巡雲南交人誘邊氓盜掠殺吏民方議用兵瑩移諭禍福交人畏御史清梗皆納款出知松江府府富贍瑩布衣疏食孚於士民再知平陽以薦陞河南按察使未幾尹應天陞南工部侍郎改都御史巡撫湖廣計擒錦田賊酋解散其黨奏省諸藩王營造費金凡百萬計以疾致仕薦起撫治鄖陽鄖襄流冗安輯召爲南刑部侍郎雲南晝晦五日勅瑩考察雲貴諸吏罷遣千餘人召

還部爲尚書十八年致仕正德三年逆瑾誣其妄理隆平侯事及擅減上供布收贖奪其官比瑾誅瑩已卒三年詔復原官贈太子少保謚清簡瑩明習法令潔已好修侃侃自樹交游稀寡人皆敬而畏之

廣東叅政胡廷慎謚 子惠附

胡謚字廷慎會稽人景泰間鄉試第一登進士歷山西提學僉事第士等如別黑白士類頓興毀諸淫祠增祀陶唐義氏和氏以下十餘人遷副使風采益振郡民李鐸聚衆爲亂計擒之調河南建大梁書院祀濂溪以下十人尋擢廣東叅政而卒謚爲人穎敏嗜學動必師古歷官三十年室如懸磬怡然自若人稱爲真儒其子惠亦舉進士登仕十五年兩丁父母憂哀毀逾制終刑部主事孝友廉介克世其家

應天府通判林孟陽春

林春字孟陽其先台之寧海人洪武初以戎事遷居金陵又遷山西太原右護衛父本榮又遷代州至春又遷萬全都司龍門守禦所至宣府乃定居焉春生於太原性資穎異有志於學比至宣府時縉紳儒碩謫居於是

者衆春往從之資其講益入萬全都司爲弟子員以尚
書領景泰庚午順天鄉薦會試中副榜當得校官不受
入太學益博覽羣籍工古文辭從翰林學士呂文懿原
卒業期必中進士而竟不成待次吏部僅授應天府通
判專理馬政以清節自厲攻駒考牧恪盡乃心公平不
苛民受其惠無敢于以私者每行縣較閱止食公廩一
毫不取於民蒔蔬公廨隙地至則摘以自給或有笑其
迂者春日我儒者誠迂若楊伯起則古之迂者也我願
學焉未幾以中暑卒年六十有一春爲人外雖和易而
內實剛毅處兄弟篤於友愛性酷好書每暇輒磨墨伸
紙揮汗呵凍寒暑不少廢筆法清勁道麗得者皆珍襲
之居官孳孳愛民廉潔之操乃其素志不以始終有變
故其卒也貧無以爲歛哀積衆賻僅克歸其喪云

兩浙名賢錄卷之三十五終

通政司右通政陳世用嘉猷

監察御史董廷瑞琳

子鑰附

山東按察司副使張鳴玉珩

武昌府知府吳天爵福

子俊孫光世附

太常寺少卿鄭瑤夫環

刑部員外郎李文盛衍

雲南按察司副使許昌世盛

刑部郎中沈原質彬

趙州知州童邦英俊

四川按察司副使張仲明昂

兵部員外郎童廷式品

工部尚書張時俊嶺

刑部右侍郎徐明德懷

右副都御史張孟介庶

山西提學僉事楊質夫文卿

子叔達叔通附

澤州知州陸仲奇偉

工部都水司郎中趙有年年

太平府知府劉世用忠器

僉都御史王希文純

雲南府知府董德初復

岳州府同知施克明德

貴州叅政沈原節榮

從子煉
孫垣附

雲南左布政使丁養浩

廣西叅議張文衡銓

刑部侍郎沈文進銳

吏部尚書王德輝華

刑部侍郎楊志仁茂元

刑部尚書高肅政友璣

副都御史朱廷璧瑄

監察御史包民望澤

鄖陽府知府俞廷臣蓋

涿州知州薛有年穰

河南左叅政秦從簡文

都御史王汝言綸

刑部侍郎王德深浚

工部尚書蔣粹卿瑤

都御史胡汝登東臯

都御史宋孔瞻冕

孫岳附

太僕寺正卿胡時振鐸

廣西布政使楊惟德守隅

濰縣教諭吳夢夔夔

湖廣按察司副使徐汝容潭

山東叅議徐成之守誠

大理寺司務姜實夫芳

吏科給事中吳子華薜

湖廣按察司副使俞仲才振才

弟振英附

兩浙名賢錄卷之三十六目次終

兩浙名賢錄卷之三十六

兩浙名賢錄卷之三十六

東海徐象梅仲和氏譔
大易馮洪業茂遠氏閱

清正

明二 共六十六人

廣東左布政使陳士賢選 子戴附

陳選字士賢臨海人自少潛修獨請不求人知惟以古
聖賢為志天順庚辰試禮部嶺南丘濬得其文曰此古
君子也置第一及相見而貌不揚濬曰吾聞荀卿云聖

清正

卷之三十六

光碧堂

賢無相將無是乎。授監察御史，出按江西，風紀大振。布按長貳謁，每易素服以入。選曰：此非憲綱體也。人臣觀君服，必視其品。顧獨殺於御史乎？於是皆動色相戒，不敢犯。已督學南畿，校士一以德行為本，試卷明列諸生姓名，不爲糊封。曰：吾且不自信，何以信於人邪？至誠相臨，無不感動。條冠祭射儀，令諸生以時肄之。每按部，就止學宮，徐行審觀，周旋磬折，絃歌俎豆，古風郁然。前後三載，變色之言不施於衿佩，而成就典起，至不可縷數。遷河南兵備副使，尋改提學中州。學者咸慶得師，會倖奄汪直被命巡郡國，都御史以下咸匍匐趨拜。選獨長揖直怒曰：爾何官敢爾？選曰：提學直愈怒曰：卽提學寧大於都御史邪？選曰：提學非都御史比，但宗主斯文爲世表率，雖死不可屈節。直見選詞氣嚴正，舉止安舒，而諸生且集署外，不可犯，遂改容曰：先生無公務，相關自後不必來。選徐步而出，尋轉按察使，擢廣東布政使。時嶺南市舶太監常眷專恣，倍尅勒富民供辦，選奏減其數，眷復縱黨通番，番禺知縣高瑤發其贓鉅萬，都御史宋旻不敢詰，選獨移文獎瑤，眷深銜之。知中官咸疾選。

乃誣摭選黨比高瑤和同貪墨。上怒遣刑部郎李行會巡按御史徐同愛鞠之。行同愛畏眷不敢反異。復賂選所黜吏張褱令誣執選。褱不從行等阿眷執褱拷掠。褱曰死卽死耳安敢以私憾滅公義陷正人也。行等羅織無所得乃誣選矯制發粟曲庇屬官罪當徒奏入。

詔奪選官遣錦衣逮選士民數萬人號泣遮留以衛士。辟除始得出省城至南昌疾作卒於石亭寺時年五十八。友人張元禎歛以疏綌或咎其薄。元禎曰公平生清苦殮以時服公志也。張褱乃上言臣聞周公元聖而四

國之謫乃致上疑於其君曾參大賢而三至之言不免近惑於其母豈成王之不明參母之不親哉凡以口可鑠金而毀可銷骨也。陛下明並日月恩同父母詎圖怙冒之中尚罹屈抑覆盆之下復有沉寃竊見廣東布政使陳選少崇正學夙抱孤忠孑處羣小之間獨立衆憎之地太監韋眷通番敗露知縣高瑤按法持之選移文嘉獎以激貪懦固監司之體也奈何宋旻徐同愛怯勢保奸首鼠兩覷以致眷橫行胸臆汚鱗清節熒惑聖明。勘官李行承眷頤指鍛鍊成獄竟無左驗臣本小吏以

註誤觸法爲選罷黜寔臣自取眷妄意臣必憾選以厚
賂啖臣令扶同陷選臣雖胥徒安敢欺昧心術顛倒是
非眷旣知臣不可利誘乃噤行等逮臣於理彌日拷掠
身無完膚臣甘死籲天終無異口行等乃依傍眷語文
致其詞劾選勘災不實擅便發倉曲比屬官意圖報謝
是毀共姜爲夏姬詎夷齊爲盜跖也頃年嶺外地震水
溢漂民廬舍屬郡交牒報災老幼引領待哺而撫按藩
臬若罔聞知選獨抱隱憂食不下咽謂展轉行勘則民
命垂絕所以便宜議賑志在救民非有他也選素剛正
不堪屈辱乃爲勘官凌侮憤懣成疾旬日而殂李行幸
其就死不爲醫療又遣養子密報選死於眷以快其憤
宵人佞毒一至於斯司寇之屬要在詰姦刑暴安取此
輩爲也夫選砥節奉公橫罹讒構君門萬里孰諒其冤
臣以罪人擯斥田野秉耒自給百無所圖敢冒死披陳
甘心鼎鑊者誠痛忠庶銜屈抑之冤長讒佞之奸爲
聖明之累也奏入不報第以他事罷眷鎮守弘治初工
部主事莆田林沂疏雪選寃詔復官禮葬正德中追贈
光祿卿謚恭愍初選做范文正公置田百四十畝祀先

周族名思遠莊迨卒族以選貧甚舉田還其子戴戴不
可曰先人行義戴取而私之獨不媿乎人謂選有子云

監察御史金尚義忠

父愷兄尚德附

金忠字尚義處之麗水人父愷官雲南按察司僉事忠
少從父宦游四方甫就學輒弃去商販蘓松間年二十
見兄尚德舉進士復奮就學補雲和博士弟子數年應
貢升國子生天順甲申登進士第會修英廟實錄奉

命往應天等府搜採事蹟還簡試御史於南京尋拜貴
州道御史卽上疏陳三事皆人所不敢言者出巡上江

抵南康諸府法尚嚴肅沿江諸司各鑄木榜籍兵尅期
更相考覈往來江上無虛日盜不敢肆攝雲南江西山
東三道事未幾奉臺檄巡鹽松蘓諸郡忠執法不變有
被按者誣以事奏遂逮捕忠聞命以妻子屬其友陳御
史直大曰吾不免矣自往就逮入詔獄獄成命戍遼東
三萬衛忠談笑就道至遼杜門謝客有達官問所欲忠
謝曰此正忠平生所不敢爲者居六年病卒時諸子皆
不在側家人以冠帶服忠忠已不能言但搖首至再易
深衣乃一頷而絕時年四十有八忠性剛斷負才氣見

義無所讓。同邑進士吳榮卒，貧不能舉，忠合賻治葬。又贈所鬻田若干畝，遺其家。貢御史壁道死，忠具棺歛歸。其喪致賻以行。所著有甕天稿三卷，東甌童子吟稿三卷，廣惠集方一卷，藏於家。

寧國府推官王克順樞

王樞字克順，涇人。景泰中，以貢授寧國府理刑，剖決明敏，獄無冤滯。丁氏婦鄴，少寡，其叔挑之，鄴欲聞於官，叔懼，誘母訟以不孝，守將刑之。樞廉得其情，爭於守曰：「公不惜一婦人，獨不惜寧國郡三年不用乎？」守悟，鄴得免。未幾卒，囊無餘金，民爭出錢為賻，其子某謂不可以喪故污吾父，盡却之。太守聞而嗟異，與同僚各捐俸以助。始克歸葬。

萊州府知府施廷偉奇

施奇字廷偉，嘉善人。登景泰甲戌進士，授工部主事，奉使山後諸鎮，閱兵砦，邊將有餽遺者，悉却之。尋復清匠江西，至建德，鄉人有官藩幕者，以白金來餉，奇駭曰：「是安得此？若執汝則賣庶矣。」亟去。鄉人慙而退。成化初，擢知太平府，丁外艱去。服闋，改知萊州府。卒，奇為人挺挺。

有風。搯尤精吏事。楊繼宗時爲嘉興守。每造其廬。疏食對談。盡日廼去。而奇。未嘗一語及私。當路莫不嚴重之。
刑部郎中項文祥麒

項麒字文祥。仁和人。景泰七年。由舉人授南京吏部司務。歷陞南京刑部郎中。當憲皇登極之初。詔求直言。麒應詔指陳五事。一曰。務正學。二曰。納諫諍。三曰。崇節義。四曰。遠近習。五曰。弭天變。語甚切直。皆人所不敢言者。無何以病乞致仕。家居三十年。絕跡公府。甘貧。屢空寄居於人。巡按吳某高其節槩。授室一椽。始有寧止。厨無兼日之積。而自視坦然。吟咏不輟。平湖竇尹以賄敗。臬司邵蕙憲舉麒清節。諭之曰。汝何不學項正郎乎。蓋媿之也。尹意邵雅重麒。卽暮持百金求爲營解。麒厲聲却之。尹慚媿而退。未幾。以無疾終。後巡按御史唐鳳儀以麒與王琦。褚遂良同里。表其里爲忠清里。奉王項之主。配於褚廟。學使孔天胤。又別建揚烈祠。以祀王項二公云。

副都御史吳尚忠誠

子瑜附

吳誠字尚忠。錢塘人。景泰辛未進士。授兵部武庫司主

事。歷官至都察院副都御史。巡撫湖廣。明年改雲南。卒於官。誠才識宏遠。前後所歷官。皆有政績。賢聲。其撫雲南。叛夷尤盡心力。爲人淳樸簡重。孝友誠確。敦厚姻族。耻言人過。與人交。敦信義。久而不渝。宅心恬澹。衣裘朴野。居鄉。混迹閭里。未嘗飭騶從。盛車徒。嘗以婚禮。盛服入城。鄉人廣南守徐敏見之。疑其變節。過朱叅政鏞所。言及。相與嗟悼之。頃則誠至。見二人有不豫色。詢其故。二人曰。時俗可傷也。誠曰。非以誠。今日輿服之異常。與二人曰。然。誠告以故。且謝過。卽屏去。復衣故衣。其淳朴如此。子瑜。官御史。砥節礪行。卒。殮具不給。稱濟美云。

右通政陳世用嘉猷

陳嘉猷。字世用。贄之子。自餘姚遷家於杭。舉景泰辛未進士。授禮科給事中。轉刑科。嘗兩使外夷。堅辭餽獻。清風峻節。夷酋皆敬仰之。陞通政司右通政。居父喪。哀慕不輟。無何卒。

監察御史董廷瑞琳

子鑰附

董琳。字廷瑞。鄞人。景泰五年進士。除南京監察御史。時掌錦衣衛事。都指揮劉敬父子怙勢肆虐。言官莫敢誰

何琳獨疏其不法，敬遂逮繫降黜，而子亦戍邊。風裁凜然，轉山東按察司僉事，劬勞致疾，乞歸卒。子鑰，字啟之，弘治庚戌進士，補上海令，陞監察御史，出按雲南，鎮守太監孫景與都督盧和交構，累經按鞫，莫敢與決。鑰承旨一訊，輒得其情，皆置諸大辟，巨豪爲之斂迹。及劉瑾竊柄，除不附已者，乃矯詔逮之，勒令致仕。瑾誅，復徵，竟以病不起。父子俱以神羊觸邪，直聲振天下，至今人稱真御史者，必曰大董小董。

山東按察副使張鳴玉珩

張珩字鳴玉，仁和人。少介特，力行好修，嘗以一介不取爲本分內事。嘗溫州却金亭爲近名人，多以庶士期之。景泰元年，領鄉薦，甲戌授監察御史，整點京營壯羸，老弱過目，輒不忘人，皆憚其明察。丙戌陞廣東按察司僉事，尋改山東，嘗錄一劫盜獄，發奸摘伏如神，部衆驚服。性廉介，中貴溫某感其舊德，餉以金綺，珩拒却之。溫媿而擲於河。甲午陞本省副使，致仕歸，橐中蕭然，僅如素士。卒之日，幾無以爲殮。

武昌府知府吳天爵福 子俊孫光世附

吳福字天爵錢塘人初起刑部掾屬以從征閩寇鄧茂
七有功授兵部司務景泰二年復從都御史蔣琳撫貴
州叛夷尋改工部福爲人。廉直義不苟取嘗過寶應夜
宿驛中獲遺金數百兩急呼驛官掌之詰朝牒付縣爲
修學費尚書倪謙學士錢溥咸爲紀其事海內多誦美
之仕終昌府知府子俊孫光世相繼以科第顯遂稱
世家云

太常寺少卿鄭瑤夫環

鄭環字瑤夫仁和人厚之子天順庚辰進士及第授翰
林院編修與修英廟實錄遷修撰再遷司經局洗馬
主考兩京鄉試授皇太子經於文華殿陞南京太常
寺少卿欲迎養其母母不欲行乃留妻以代養獨處京
邸或勸買妾環曰若是則以養母給吾婦矣比歸省則
妻已卒乃奉母之官終身不娶平生直諒誠慤人有過
則正色規之方毅寡諧與人處同列多不樂其所爲然
察環無他腸終亦不怨也尚書魏文靖嘗遺書戒子曰
事事當法杭之鄭瑤夫庶可爲人矣其見重於名賢若
此所著有栗庵稿藏於家

刑部員外郎李文盛衍

李衍字文盛，鄞人。貢入太學。中順天乙卯鄉試。會王振承張太后旨，選衍寫經托疾弗往。因久次不遷，遇恩例授廣州府推官。屢辯冤獄，以撫勦反寇有功。陞刑部員外郎。時曹石用事，亨家人奪民產，訴於朝。衍承命往勘歸田於民。大忤亨意，諷錦衣門達構衍重罪，謫戍宣府。亨敗，得復官還田里。以孝友稱。

雲南按察副使許昌世盛

許盛字昌世，世居海鹽之武原鄉。後析隸平湖，遂爲平湖人。生而穎異，喜問學。工文辭，領景泰丙子鄉薦。天順癸未，禮闈火，更秋試。中式甲申，賜進士第。授刑部主事。進員外郎。慮囚陝西，平反洗雪者百餘獄。擢四川按察僉事。練習律比，肺石之下無冤民。內艱服闋，補原官。分巡川北大竹，飢民投券富家而取其粟，有司坐以劫盜律死。盛閱牘，歎曰：「投券貸粟以救死耳，隱貸爲劫，非情已。且民方自生於飢，而子民者顧誣死以盜，如父母何！」令貧民具本息以償富家，悉杖而遣之。歡聲動地。時儀隴土寇嘯聚，勢方克斥，聞飢民之獄得平也。皆額手呼

天曰許父仁人也吾屬寧可自棄於覆露之外應時解
散境內以寧外艱起復改山東未幾轉雲南按察司副
使民有鬻銅爲業者其仇誣以盜礦獄具已盛辨其寃
立釋之其人詣臬門臂香以謝尋乞致仕歸盛剛直庶
介所至有冰蘖聲俸入所餘悉以賑親黨之貧者歷仕
三十餘年衣粗食糲如寒素致政歸囊橐蕭然雖屢空
不愠也身歿未幾子孫貧不能自存至今邑中稱清白
吏者必首許副使云

刑部郎中沈原質彬

沈彬字原質武康人莊重端謹問學閎遠第進士拜刑
部主事進員外郎小心勤慎練達治體爲部長所信任
凡疑獄平反必與之裁制丁外艱起爲兩淮漕運理刑
尋遷雲南清吏司郎中司隸京畿訟獄視他司倍乃益
明慎聽斷死獄必求其生且曰求其生或失於死入於
死可復生乎故雖死者亦自以爲不寃然竟以勤勞致
疾乞休養杜門不出其居官以清白自守囊無餘貲有
司時有所遺輒辭不受人咸服其高致

趙州知州童邦英俊

童俊字邦英，蘭谿人。識達天人，學窮理奧。由舉人知嘉定，時民事田獵，不知耕稼。俊教以力穡，至今祀爲稷神。遷知趙州，出富民陸氏之寃獄，識拔進士安魁於賤隸。因內臣王政巡歷踐踏士類，不屑折腰，遂拂袖歸。民攀車泣留，共立生祠祀之。歸家，饗殮不繼，家人撤其几以易米，則持卷於手，誦讀如故。日夕考索經傳，作書韻會通若干卷。士論評其家學精則童品博，則童琥兼之者俊也。

四川按察副使張仲明昂

張昂字仲明，都御史楷之孫也。自慈谿徙居鄞平橋之南，生有奇質貌古而性剛。登成化壬辰進士第，授鉛山縣知縣，有異政。一時稱爲神君。以最擢南京監察御史，時威寧伯王鉞挾其武功，偕保國公張永、太監王直、兵部尚書陳誼將挑募北邊。昂曰：是爲國家害，不小。抗章劾之，詞連內閣司禮。由是內外大臣皆銜之而未發也。會南京守備太監薛琮聞昂名，求見不許。且劾琮鬻放軍伍，琮乃誣奏昂擅作威福，遂左遷南京通政司經歷。久之，以薦轉四川按察司僉事，查理塩法。蜀中塩利最

饒先是理鹽者，幸以賄敗，梟搜剔弊蝨，一新以法。性磊
砢，不能與世偕。又每以執法失上官指，遂再疏乞休，不
許。而遷梟副使，守備建昌、黎州等處。時同事馬太監信
用術士周慧，以其善黃白術，將進之朝。梟聞而驚曰：「是
唐之柳泌也。」卽擒慧置獄，而劾馬之妄事，乃獲寢。歲餘，
度終不能容於時，乃和陶潛歸去來辭，引疾歸。時年甫
六十，環堵蕭然，出入不能備騎，從家人糠粃或不瞻而
超然容與，日以經史自娛。歲嘗大侵，大臣賑飢浙東，聞
梟窶甚，遺五十金，堅拒弗受。利害禍福，不待解遣而自
不能膠其中，雖於俗不屑苟同，而對衆坦坦，不爲畛域。
胷懷如冰玉，不可點染。其表姪憲副，余本每侍梟，未嘗
不勗以道義。病旣革，猶張目謂之曰：「努力今日，人才自
勵者少。若能扶持一日，是培國家元氣於一日也。」蓋立
身爲國之心，至死不亂云。

兵部員外童廷式品

童品字廷式，蘭谿人。幼與章楓山齊名。成化甲辰，貢於
鄉。丙午舉南畿。又十年而始成進士。或勸之減年通籍，
曰：「吾早學而晚達，命也。敢爲欺乎？」授南京兵部武庫司

主事再遷武選員外郎武庫頗有羨餘同官以唾庫諷之云不可立異以取忤僚友不計也有指揮詭以文憑失水求之任侍郎力庇之品力爭不可聲色俱厲尚書解之曰童員外義理勇也居官僅兩考遂引年致仕家居十九年以讀書喪明貧不自振而卒所著有周易羽義春秋經傳辨疑禮記大旨正蒙發微含章子集金華文獻錄若干卷

工部尚書張時俊嶺

張嶺字時俊蕭山人成化丁未進士明年弘治改元簡

纂

憲廟實錄於蘓松常鎮乘筆惟公不惕權勢除江

西上饒縣知縣以治行第一陞南京兵部車駕司主事先是部屬入守備聽見中貴執禮甚卑嶺肅揖而已剛正之名赫然晉本司員外郎正德初劉瑾擅權勢傾中外適隆平侯張祐卒無嗣弟姪爭襲奏行該司勘問賂瑾囑嶺不可奪乃矯制取入刑曹未幾出知興化府單車赴任時郡人戴大賓弱冠登第瑾欲以姪女奪其舊聘囑嶺主之嶺不應瑾大怒遂據隆平侯事落職瑾誅起守南雄清操益勵甫一年陞江西叅政時宸濠潛蓄

異謀賂結中外諸臣亦欲要致貴陰使人道意貴正色拒之遷本司右布政尋轉左時濠欲拓府居以擬大內貴堅不許一時縉紳咸以鉄漢目之濠忌終於掣肘賂擢貴南京光祿寺卿尋拜右副都御史巡撫保定地方適武廟巡遊權豎江彬錢寧輩往來旁午誅索郡邑貴一無所應統轄安堵羣小謀以擠之遂移疾歸世宗皇帝入繼大統詔求耆舊起擢右都御史總督兩廣軍務兼理巡撫計擒上思州官黃鏐剿平劇賊嚴阮蔡猛三等諸寨斬獲萬餘人民遂以寧取掌南京都察院尋陞工部尚書再疏乞休卒年七十有四禮部得請如例祭葬貴爲人剛方質直服用朴素居鄉出入不用輿馬處鄉人如家人父子情意藹然接有司未嘗不以時政得失相規居官四十餘年計其所殖僅足以自給庶潔之操始終不渝人以爲難

刑部右侍郎徐明德懷

徐懷字明德建德人天順庚辰進士筮仕刑部由員外郎陞江西按察司僉事遷湖廣副使守瓊州未行改湖廣久之進按察使未幾陞江西右布政使轉左弘治改

元召爲都察院右副都御史，飭畿輔邊備，兼巡撫兩京，俄擢南京刑部右侍郎，以疾乞休，不許，卒於位。懷學識，端正操履，謹嚴習典故，洞世務，事入手，沉密，不卽發發，卽不可梏法，當然不假借一毫，素無私請於人，人亦不敢請以私。賢者無顯晦，一見如平生，惟而稔，非其人雖當要途，禍福在呼吸間，視之藐然也。起家司寇，隨所至，獄無滯囚，且曲得其情，如神明。左憲皆理屯種法，立弊清屯，無惰兵，江西增蕪田租三萬餘石，湖廣所增數亦如之。握憲畿輔，任益重，惠益弘，修築關隘，九十餘所，率不踰時歲。大侵請發戶部銀米以賑，復借內帑金帛爲糴本，實州縣以防後虞。歷官中外三十餘年，不問家人生產，非義物未嘗一日及見。義所當爲，則直前不讓，每處危疑大事，皆不動聲色，犁然當人心，而禍本以消。鄭司成廷綱傳懷謂見精識到，智者莫能測，巧者無所售。君子以爲實錄。

右副都御史張孟介廉

張廉，字孟介，歸安人。成化丙戌進士，歷刑部主事，員外郎，郎中，嘗使封藩，堅却餽遺，一時以爲廉。擢江西按察

司副使時賊寇廣信永豐銀礦。廉命塞之以絕其望。賊遂解散。轉桂州按察使。奏誅印江豪酋。置縣官。及遷左布政使。與征都清苗寇有功。請增桂州解額。自廉始。擢右副都御史。巡撫貴州。疏言屬府黎平僻遠。而五開軍衛牽制兩省。宜令湖廣兵備副使聽節制。及削鎮遠土官。置縣官。如印江例。皆從之。廉剛方耿直。好面折人過。動與物忤。由是被劾致仕。行之日。父老軍夷無慮數萬。遮留之。正德四年四月卒。於家年七十六。三吳士一脫。自卽致貲鉅萬。不必久宦。已家比素封。廉歷仕三十餘年。旣卒而家無厚產。不爲習俗所移。論者以爲賢。

山西提學僉事楊質夫文卿

子叔達叔通附

楊文卿字質夫。鄞人。發解浙省第一。舉會試第二。授兵部主事。父死免喪。改刑部。時有尹清者。夜飲殺人。事覺。匿豪家。令其妻賄同飲者。張鐸承之。文卿一訊。知其誣。根捕尹清。豪長者爲請。不聽。竟坐清而釋。左驗者。歷員外郎。郎中。陞山西提學僉事。嚴條約。公勸懲。嘗曰。考試糊名。此以革提學之弊。非革士子弊也。不自爲弊。安用是。竟不糊名。士無異議。屏巫覡。毀淫祀。凡緇黃之居。皆

更爲社學、選秀異子弟、讀書習禮、其中士風民俗、爲之丕變、陞山東提學副使、其教一如山西、以積勞致疾卒、文卿外員而內方、平居恂恂和易、臨事卽確然不可奪、居官律已、務爲清約、門無私謁、室無長物、其死也、橐無餘貲、惟圖書數篋而已、子叔達、隱居不仕、以孝義稱、叔通、第戊辰進士、歷官山西左布政使、乞納祿歸、廉儉不媿、其父云、

澤州知州陸仲奇偉

陸偉字仲奇、錢塘人、領成化乙酉鄉薦、家貧、開門受徒、資以爲養、二親相繼歿、哀毀幾滅性、服除、謁選吏部、試第一、授山西澤州知州、州罹游飢、人相食、偉奏發內帑以賑、先出倉粟作糜、以食餓者、區畫纖悉、不懈晝夜、全活以數萬計、州多宗室、和買吞併之害、其來已久、歲發祿米稍後、辱及官吏、以爲常、偉悉裁之、以法世家大族、武斷鄉曲、凌轢閭左者、禁不得肆、與夫請托一切不行、因相與銜之、乃曠宗室、誣奏偉數事、下三法司勘讞、詔使初至、惑於浮言、幾中偉以危法、而州民無老稚填咽、街巷爲偉稱寃、使者旣至、始庶得其實、事乃白、知州事

如故。而偉益以風節自持。所治有寧山衛軍民雜處。恒患弗靖。偉懾之以威。彼此帖然。總鎮中官有祗候之索。所屬爭先取容。偉獨不與。旣而政通人和。民莫不愛戴。之如父母。而前之怨家。暨諸宗室。益不自安。輿訛造謗。爲害方未已也。偉乃歎曰。人當自知止足。不然必速顛。濟乃力懇當路。致其政而歸。州民攀留數十里。車不得行。爭卧轍而啼。如嬰兒。偉慰諭再三而後去。偉歸。惟以教誨子孫爲務。家人奉之如嚴君。宗族不能婚娶隣里不能殯葬者。已。雖不給。亦汲汲以周之。間與鄉之不仕。及倦而歸者。徜徉於湖山之間。更唱迭和。有歸田錄傳於世。偉每稱曰。士當以立志爲先。以涵養爲要。否則大本不立。一事不可爲矣。君子以爲名言。

都水司郎中趙有年年

趙年字有年。蘭谿人。成化乙未進士。授行人。屢奉命行祀事諸王府。凡饋遺一無所受。在陝西。值歲歉。減廩餼。爲藩臬。諸臣倡以賑民飢。全活不可數記。陞工部營繕司員外郎。監本部廠。宿弊除革殆盡。中貴憚之。差監稅蕪湖。積羨餘萬金。悉籍之。公帑代還。管理五城九門事。

清江
卷之三十六
執法嚴正不可犯。一時目爲趙鉄面。未幾晉都水司郎中。時中貴有希旨。將於衢州府織造金龍絹者業已成。年聞之。卽抗疏極言不可。上允其奏。自是中貴側目。相與吹毛索其癢。弗可得。乃誣以嘗鬻所乘馬。多索價值。下詔獄。終不少屈。以求免。竟坐除名歸。而一室蕭然。饘殮不繼。處之自如。所著有一得稿。碌碌集。藏於家。

太平府知府劉世用忠器

劉忠器字世用。新昌人。成化初進士。出知永安。改崇仁。擢南臺御史。終太平守。爲人清操。自勵不可干以私。郡有豪宦。專持守令陰事。以行其私。忠器待以禮。稍有請託。輒拒之。其人卒。亦不能整也。居鄉出入徒步。自釋褐。至橫金。匹馬隻夫。不以煩有司。或以例言。忠器曰。吾無一毫及鄉里。敢勞費之邪。居恒惟以一園蔬。韭自給。卒於官。橐無遺金。子孫窮乏。不能自振。而忠器之名益彰。

左僉都御史王希文純

王純字希文。世家慈谿。登弘治癸丑進士。第授大理寺右評事。歷左寺正。陞江西按察司僉事。領兵備平瑞州。賊功最陞河南按察司副使。領潁州兵備。兼理淮陽諸

清正
處屯田未幾改廣東時逆瑾以賄招天下響應監司守
令爭輦金寶奏其門如日中之市純獨不通問瑾痛恨
之適丁父艱去瑾矯詔罰輸邊粟一千石純掃室以應
不足又稱貸而益之無愠容服闋改雲南金齒兵備陞
大理寺右少卿時有上變告山東歸善王謀不軌者純
奉詔往鞫之同事者欲深治其獄以爲功純不肯一持
以正平反者數百人轉左少卿未幾陞都察院左僉都
御史巡撫宣府時上於宣府有所營建純疏止之不
報會與同事中貴不協遂以疾乞致仕歸純性弘毅喜
名節任義有賁育之勇其所否者視之若脂居官俸入
外未嘗私一錢尤精法比事至立決而多以恕持之故
宦轍所歷至今稱爲福星子鎔自有傳

雲南府知府董德初復

董復字德初會稽人成化中進士知黟縣爲民寬徭賦
捍水患卹孤乏抑兼併奏最徵拜監察御史孝皇登
極首疏斥貴倖數十人直聲大振然以是爲用事者所
憎出知雲南府其治一如黟縣時民夷德之復性坦直
無他腸居官務盡職無顧避是以所至輒奮晚歸衣無

清正
卷之三十六
三
統緒屋數楹僅庇風雨足跡罕到城市家居孝友日惟課子讀書故子玘卒能振其業自有傳

岳州府同知施克明德

施德字克明秀水人成化辛卯中鄉試爲人剛明仁恕居鄉時卽以鋤強扶弱爲已任弘治中爲濮州守興學勸課洗冤滯賑貧乏士民愛利之豪右懾服不敢肆已陞岳州府同知其惠政一如治濮時抱疾歸居家閉門掃軌赤一不至公府寓情詩酒以天年終

貴州叅政沈元節蔡

從子煉孫垣附

沈蔡字元節平湖人成化中進士授工部主事監龍江商稅力祛時弊有庶能聲知潮州府嚴通番之禁公私鹽之稅未幾艱歸服除調延平所至不畏強禦歷延平臨江皆有清譽尋陞貴州叅政糧運軍餉裁制有法乃上疏乞養伯兄早世撫教其孤煉登進士弱冠有聲歷任江西叅議宦轍所至豪右屏息墨吏皆望風引去桃園寇勢猖獗煉以文臣兼武事誓身殉難卒平寇凱旋家居睦族信友足跡不至公門蔡孫垣嘉靖乙未進士授大理評事錄囚廣西出冤民七十餘人時土官餽餉

一。無。所。受。獨。取。一。膠。槌。懸。之。平。樂。公。解。廣。人。至。今。謂。之。懸。槌。館。後。陞。惠。州。知。府。政。先。風。化。教。民。孝。弟。民。風。丕。變。涖。任。一。年。中。瘴。而。卒。雲。南。左。布。政。丁。養。浩。

丁。養。浩。仁。和。人。成。化。二。十。三。年。費。宏。榜。進。士。累。官。四。川。按。察。司。副。使。時。有。墊。江。富。民。殺。人。給。孤。姪。使。冒。罪。賄。成。其。獄。養。浩。廉。知。其。寃。竟。反。坐。轉。廣。東。右。叅。政。時。河。源。程。鄉。賊。蠶。起。募。人。守。要。害。使。不。得。逞。凡。民。夷。雜。處。者。爲。圖。區。別。以。示。軍。官。嚮。往。以。次。擒。剿。四。境。底。寧。歷。陞。雲。南。左。布。政。致。仕。卒。平。生。剛。介。不。阿。在。言。路。有。蹇。蹇。譽。事。母。孝。歷。官。三。十。年。妻。子。恒。留。事。母。而。以。一。僕。自。隨。

廣。西。叅。議。張。文。衡。銓。

張。銓。字。文。衡。仁。和。人。吏。部。郎。中。信。之。孫。太。僕。丞。瑛。之。從。子。也。成。化。辛。丑。進。士。官。刑。部。主。事。爲。人。耿。介。不。阿。剛。方。直。諒。多。挺。挺。大。節。時。尚。書。南。宮。某。事。多。偏。徇。銓。據。法。執。爭。屢。至。厲。於。聲。色。尚。書。深。憾。之。然。亦。不。能。奪。也。冢。宰。屠。某。與。銓。有。葭。莠。親。銓。絕。不。與。通。適。屠。有。慶。事。同。僚。期。與。偕。行。銓。義。不。往。屠。大。憾。之。以。爲。輕。已。人。有。薦。銓。者。屠。尼。

不行銓在刑曹十八年風節愈勵家貧甚其妻日製冥
鏹給衣食竟以廉介不求出爲廣西叅政舟覆而死
於水

刑部侍郎沈文進銳

沈銳字文進仁和人成化己丑進士授刑部主事進員
外尋陞江西按察司僉事初官西曹法比精練同僚推
重及提刑江右聽讞明允事至迎刃而解會瑞州盜發

銳坐分地謫雲南廣西府通判以艱去服闋改判徽州
未幾陞廣東僉事瀧水後山賊起勢猖獗銳親率偏師

直搗其巢俘獲甚衆平民脅執者皆爲昭雪所全活者
殆千餘人復改江西僉事銳方介寡合不肯屈志以干
進官五品者二十四年他人爲之不平乃稍遷副使陞
廣西按察使明年進廣東左布政使尋陟應天府尹南
京刑部右侍郎未幾乞歸已而逆瑾盜柄多鈎擿往事
以誣士大夫之不附已者遂落職平生清介絕俗家居
杜門泊如也嘉靖初追論舊德乃復其章服卒

吏部尚書王德輝華

王華字德輝餘姚人生而警敏讀書過目輒不忘六歲

與羣兒戲水濱見一人醉來濯足濯已便去遺所提囊取視之數十金也華度其醒必復來恐人攫去舉投水中坐守之少頃其人號泣而至華迎謂曰求爾金邪爲指其處果得之其人喜以一鋌爲謝華笑不受成化庚子領浙江鄉薦第二明年廷試第一甲第一人授翰林院編修歷官南京禮部尚書弘治中內侍李廣有寵華爲日講官嘗講大學衍義至唐李輔國結張后表裏用事誦說朗朗無少避忌左右皆縮頸吐舌上樂聞之不厭講已遣中官賜尚食正德初逆瑾專政士大夫爭走其門華時爲禮部侍郎獨不往會華子守仁以兵部主事疏瑾罪惡瑾大怒矯詔杖之闕下竄南荒以去瑾復移怒於華尋知爲微時所聞名士也意稍解冀華一見且將柄用焉華竟不往瑾益怒遂出爲南京吏部尚書猶使故舊致慰言冀必往謝華復不往乃推撫禮部舊事勒令致仕華性至孝居父喪廬墓下墓故虎穴虎聚至不爲害久之益馴比致仕岑太夫人年近百歲華壽亦逾七十猶朝夕爲童子嬉戲以悅其親嘉靖初論守仁平濠功封推誠宣力守正文臣特進光祿大夫柱

國新建伯賜誥券封華勲階爵邑如守仁俾子孫世襲
 適華誕辰守仁捧觴上壽華感然曰吾父子乃得復相
 見耶賊濠之亂皆以汝為死矣而不死以為事難猝平
 而平之然此仗宗稷神靈朝廷威德豈汝一書生所能
 辨此讒構橫行禍機四發賴武廟英明保全今國是
 既定吾父子之榮極矣然福者禍之基能無懼乎古云
 知足不辱知止不殆吾老矣得父子相保牖下孰與犯
 盈滿之戒覆成功而毀令名者耶守仁跪曰謹受教自
 是華日與姻黨置酒為燕樂以母喪哀毀過禮及葬徒
 跣數十里舊疾復作竟不起年七十有七訃聞命有司
 諭祭治葬事悉如禮

刑部侍郎楊志仁茂元

楊茂元字志仁禮部尚書文懿公守陳之子以進士高
 第授刑部主事練習法比掌三法司奉勅錄南直隸囚
 多所平反陞湖廣按察司副使丁文懿艱起服改山東
 適河決張秋憲廟初命中丞劉大夏董其役繼命太
 監李興平江伯陳銳共治之興銳事多不法且掣大夏
 肘乃抗疏首言治河之策乞取回興銳俾大夏專治之

有所責效而功易成、并請革臨清鎮守、凡三事、由是中
人側目、誣以妖言、逮繫錦衣獄、上察其忠、謫長沙府
同知、後治河、一如其策、當時廷議謂茂元三疏與文懿
講學聽政、疏實相表裏、而剴切過之、所謂有是父必有
是子也、抵府、不以謫自廢、益盡心民事、過瘁致疾、乃乞
歸、家食五年、絕意仕進、卒、以薦起、知安慶府、猶堅以疾
辭、時伍符爲太守、賢者惜茂元抱經濟之略而未克用
也、率僚屬暨博士諸生抵茂元、責以大義、不得已、携二
僕以往、時府多火災、軍民苦之、乃爲文以責城隍、患卽
弭、百姓以爲神、三年考最、陞廣西布政司右叅政、風采
益厲、罔恤烟瘴、徧歷所部、必進諸父老、躬問疾苦、而爬
搔之、當是時、思用二府土官相仇殺茂元業、以計擒岑
峻、奏膚功矣、會詔改二府爲流、而降岑猛爲福建平海
衛千戶、猛不樂遠徙、遂擁兵叛、勢披猖甚於昔時、茂元
單騎入其境、諭以禍福、曰、爾畏徙、而稱兵、何異悍搯舟
而自溺也、不惟弃巢穴、且將弃首領矣、何不善謀、若是
今魚窩寨苗賊背叛、汝能備兵從征、以功贖罪者、吾將
奏請免爾遷、猛叩頭願從、卒平魚窩寨、魚窩寨者、柳慶

徃。撞也。以夷攻夷。出不意以搗其腹心。論者以是後得用閩之奇。時逆瑾擅權。貪黷無厭。差御史孫迪。假以查盤布政司庫藏爲名。所以速賄也。各道密饋瑾銀千兩。而茂元若不聞。或諷之曰。無千金。恐桎梏不免。盍速圖。以免禍。茂元厲聲曰。千金之餽。非盜官帑。則剝民脂。以此自抹。是畏無妄之災。而犯有名之律。譴將益深。可謂之智乎。有死而已。誓不爲此。瑾聞而憾之。吏部論平苗功。擬峻擢。瑾卒傳僞旨。勒致仕。卽買舟歸。瑾誅起。江西左叅政陞雲南右布政使。尋陞貴州巡撫。僉都御史奉勅兼制四川西陽湖廣湖北諸道兵。以討筭子坪平頭烏雞等苗寇。俄晉南京都察院右都御史。旣得咨矣。以爲兵糧已集。機貴神速。若需交承寇有備矣。乃住扎湖貴中界。聲言候代。而密授諸將方畧。分兵合剿之。斬鹵數千人。諸寨悉平。陞南京兵部右侍郎。改刑部。屢疏乞身。不許。無何以疾卒。年六十有七。茂元倜儻有膽畧。見義當爲。毅然爲之。不少顧。非其義。一介不取。與其初官刑部時。同年楊仕偉爲汪直所誣。事白。追減罄裝不足。又稱貸以益之。時畏直莫之敢與。茂元獨違衆假之署。

其封曰刑部主事楊茂元俸銀十兩直見之歎曰好膽氣其離任雲南也司庫有餘銀數百鎰曰無得錢吏白惟所用茂元叱之曰此正在法賊也烏得無得籍識之羣吏嘖嘖曰是何異楊公之四知性復孝友成文懿未就之志拓始祖及五世祖墓地樹碑益田以脩時饗從弟二人早失怙恃撫愛周至長求析箸乃垂泣諭以長策不可回卒舉文懿所遺田盡與之仍歲給俸祿以爲常問學宏博詩文俊麗尤精八法其草書士大夫爭寶之張都諫弘謂其字畫遒勁非特臨池之功亦正氣隨寓而見也時以爲格論

刑部尚書高肅政友璣

高友璣字肅政溫之樂清人生有至性母病朝夕湯藥衣不解帶以孝稱既舉進士乞身歸省及捧銓檄赴選途感異夢覺而驚遂復歸而母疾危克視飯含盡送終禮人以爲孝感服除授南京刑部主事歷員外郎郎中擢九江守治蹟爲十三郡最陞廣西叅政管田州府事田故夷方險地土官岑猛者坐與族類構爭削秩詔以漢官撫之謂非識達權變之人不可遂以屬璣璣聞命

單車入田境宣示威德諭以逆順之理猛初謁猶擁兵入衛久之感璣誠信遂效款束身聽命不煩兵而寇平事聞復猛官徙璣內地顧忤權倖意仍以知府調衛輝三遷而後以右副都御史巡撫大同璣洞達政體剴裁如流所至有赫赫名然數裁抑貴倖不少假卒以蜚語降二級致仕用薦起爲兵備柳桂副使復四遷而以右都御史總督漕運江淮故塩徒出沒爲患璣督兵討之誅渠魁而招徠其黨江淮肅清在漕三年進南京工部尚書改刑部已而召入北曹居三月謝病歸璣平居色溫禮恭至臨事則疑疑操執不渝雖屢蹶而與無所依違媿媿故資久而後大川旣用而不獲久學士大夫想聞其名者有冥鴻千仞之思焉璣旣致仕以俸入朔書院買贍田教高氏子姓剗望謁祠退考業講學孜孜無倦色所居僅敝廬布衣蔬食終其身蓋孝恭樸素出於天性然也訃聞詔賜祭葬贈太子少保謚莊簡

副都御史朱廷璧瑄

朱瑄字廷璧鄞人舉成化五年進士第授刑部主事遷河南布政使擢都御史總督漕運踰再期以疾致仕卒

瑄性謙和謹恪，卓有定識，默觀世故，以替災祥，皆由人致。天之報施，遠近遲速，萬萬不齊，而無不巧中者，故所至勵節介，凜不可犯。位至三品，服不能具。朱紫家居，歲歎疏食，或不給，晏如也。都御史王璟奉命賑飢浙東，念瑄貧，遺百金以佐薪水。瑄笑而卻之，曰：「公奉天子命賑飢民，非賑飢官也。且天下寧有飢官乎？官即飢亦安得比齊民？以邀十倍之惠於天子，自欺以欺人，不可環聞之。竦然不復強聞者，兩高其誼，以爲賢比。卒無以歛，當路共醵俸爲賻，而始克襄事焉。」

監察御史包民望澤

包澤，字民望，鄞之江東人。弘治癸卯，舉於鄉。丙辰成進士，首以才雋，選授雲南道監察御史。庚申，奉璽書清戎陝西，飭理寧夏固原諸要害，以風力稱已，而出按湖廣。頃，興襄二府爭攘之，執奏不已，撫按官不能決。澤至，詳覈始末，請以田歸興府，而襄府軍校得佃種如故。其事乃定。儀賓蕭璉，鞍轡諸司，王實左右之。澤曰：「數亡格憲，非制也。盍以聞。」王懼，卒出璉就獄。太和官巨璫，齊某者，

恬寵漁獵聞澤按部輒戕其下曰母縱閩羅包老擒汝
矣諸惡少無不縮手避巴東雜出洞蠻以隸省會之邊
也恒負固不靖乃度地宜奏設九溪永定兵備諸夷不
兵而服未幾復命卒於京邸得年僅五十有七澤天性
仁孝二親早世孺慕終身不衰諸弟方在襁褓篤於撫
字俾有成立比析產一無所取追念祿不逮養積俸入
置田四十餘畝爲歲時伏臘之需與諸從共之在官清
白自持門無私謁鄉有猾盜詹棟尸者善發古墓事覺
繫獄暮夜啖隣人懷玉盃二黃金數十鎰請澤丐免澤
厲聲叱之曰此盜物也而復盜盜物可乎亟言於官置
之法卒之日家無私橐惟有東川政蹟十二卷

鄖陽府知府俞廷臣蓋

子諫附

俞蓋字廷臣桐廬人成化中以進士拜監察御史出按
真定等府中貴人傅恭家豪斂民田前御史率脂韋兩
端莫敢辨蓋毅然割其田還於民且劾奏恭不法擒其
黨惡者數人服其辜時恭方幸於上莫不爲蓋危者
事且不測竟獲免出按江西九江外戚王氏萬氏勢方
烜赫其下恣橫境中吏莫何問蓋執而械之貴戚歛避

吉安知府許聰以剛愎凌上與臬司相訐奏事下蓋時
樞貴必欲置聰死蓋持平不阿忤樞貴意謫判澧州考
最擢知茶陵州改知安陸時流民嘯聚於鄖急之則變
緩之則爲後日憂兩臺重臣合奏湏才識如蓋者乃濟
遂擢知鄖陽府博詢民隱寬猛竝施學校城池祠壇廡
宇方秩然修舉而蓋以過劬致疾乞致仕歸行至武林
卒於驛舍僅年五十有五蓋所至喜興除利害疏滌冤
獄吳橋民趙綱家屠於盜莫跡其所由起蓋以御史按
其地綱見夢於蓋厥明捕盜六人下之獄一訊而服人
以爲神蓋卒之十四年仲子諫以進士拜南京監察御
史進蓋階中議大夫贊治尹

涿州知州薛有年穰

薛穰字有年鄆人宋知衡州朋龜之後領成化壬午順
天鄉薦授涿州知州涿俗強悍民好鬪兼歲大侵盜賊
四起穰至鋤強弭盜親問民所疾苦而爬搔之發粟賑
濟願以全活者億萬計三年改知灤州灤故孔道徵發
驛騷穰期會供億咸得其宜不煩而事集州歲苦河決
發帑金築長堤以捍之迄今以爲樂利灤故多中貴家

假汪直勢爲虎冠，率多不法者，穰一切以三尺治之，不
少貸，遂忤直意，遣緹騎逮入詔獄，人皆爲穰危。穰獨長
嘯曰：彼蒼者天，寧枉無罪哉！鎮撫吳綬直之鷹犬也，雖
心知穰枉，而猶脅取家人金賄，始肯貸出。穰咄家人
曰：吾寧庾死獄底耳，穰而以賄免也，何面目見天下士
乎？事卒得白，復原官。未數月，事更有不平者，乃浩然歎
曰：時事如此，尚可婪仕乎哉！遂掛冠歸，宦橐不入私室，
置薄田數畝，與昆弟共之，散其餘祿於鄉族，力行善事，
日以粉版記之，倣古人黑白豆之意。當時稱其篤行，卒
年六十有七。

河南左叅政秦從簡文

秦文字從簡，臨海人。弘治壬子，以毛詩中浙江鄉試第
一，癸丑登進士第，授南京行人司行人，轉司副，丁外艱
歸，服闋，遷刑部郎。時逆瑾之亂，羅織京朝官，刑曹易染
尤甚，文以身殉法不少貸，讞獄精明，老吏皆自以爲不
及。瑾竟不能害，未幾，遷貴州提學副使，以母喪去，服闋，
仍改陝西，文之兩以憂歸也。借宅以居，蕭然無長物。終
喪三年，哭虞祭奠，悉中禮，其兩持文衡也。以身爲教，親

爲講解大要，以抑奔競黜浮薄爲先。兩地士習爲之丕變。在陝二年，遷河南布政司左叅政。時河圯爲患，民生彫瘵而武宗日事巡遊，征調無藝，文慨然以不得行其志爲恨，遂乞身歸。時年五十有六耳。復杜門謝事，教養子弟者十一年而後卒。文歷官三十年，一介不苟。至晚年持之益堅，蓋天性然也。其自陝入覲時，嬖倖錢寧、孫安、廖鵬輩各以其故來視，輒謝不見。或以禍福惕之者，文毅然曰：君子立身自有本末，奈何與小人作緣。聞者咋舌。其堅正不撓類如此。其學術以聖賢自任，仙釋之說一不入於耳。復不爲近世門戶同異之習。四方士多就正之，稱儒宗云。

都御史王汝言綸

王綸字汝言，慈谿人。由進士除工部主事，改禮部儀制司，進郎中。各王府庶生子，奏乞祿米，綸悉裁之。以祖訓且請條牒限年以受封，歲省公廩百餘萬。陝西守臣進古璽稱賀，辨其誣。歷陞廣東叅政，湖廣右布政，廣西左布政。所至平政均役，飭舉綱維，懋著勛伐。時久次不調，逆瑾方牢籠天下士，資淺者俱獲顯擢，或勸之應曰：

三十年婺居忍改節邪萬一被螫角巾私第亦復何憾
後晉都御史巡撫湖廣年侵盜起逆瑾橫征又修造壽
榮二府第動以萬計乃賑乏蠲逋計處工役民困以蘓
奔父喪歸會仁化樂昌乳源連州盜犯柳桂甚急乃奪
情起復督兵往平之事竣歸制以疾卒綸剛方耿介不
媚流俗務爲身心經濟之學而以喜聞過罕言利爲座
右銘所著有學庸要旨節齋雜稿若干卷藏於家

刑部右侍郎王德深浚

王浚字德深嚴之建德人以進士知薊州時逆瑾擅政
中貴有占民田爲牧地者浚奪還之民瑾聞大怒矯詔
逮繫錦衣獄瑾誅乃釋陞刑部員外郎武廟南巡上

疏諫止杖闕下得不死未幾出爲山東按察司僉事兵
備沂州嘉靖改元進貴州威清兵備副使有土夷吳尚
賢偶得宋印持以爭官構亂浚設方畧擒之不費兵餉
而地方以寧又土舍安萬銓未授宣撫頗驕蹇不用命
浚以誠信撫之適寧國土夷恃險作亂久不能平衆謂
非安氏兵不可破浚移檄召之卽馳赴擣其巢進按察
使轉河南左布政使擢尹順天浚謂所親曰吾昔守薊

地衝而民貧不勝後霸饒而僻民力甚紆吾今得均之矣。蒞任未幾遂均二州之後爲霸人所中乃左遷福建右叅政。歷陞右副都御史提督南贛等處軍務時南安守某者欲規薦剝置數百金於米囊以獻浚覺而叱去之。聞者竦然在鎮三年進南京刑部右侍郎尋改北未幾九廟災遂懇乞致仕歸浚素性勤儉非疾病未嘗不雞鳴而起暇則手不釋卷其飲食服御如布衣凡祖業所遺悉推讓諸姪曰祖宗積德而發於吾幸有祿位已又可與汝輩析其私邪。敷歷中外三十餘年所至無事烜赫而去後之思恒不能已至今稱之曰篤行君子。

工部尚書蔣粹卿瑤

蔣瑤字粹卿歸安人弘治十五年進士以監察御史出守荆尋徙揚會武廟南巡諸省騷動凡乘輿供御及宦寺宮妾親軍賂遺莫可貲算瑤曰備亦罪不備亦罪備則惠及於民不備則患止於身惟站設二十更番迭遣以迎不復橫歛以爲悅權倖江彬輩橫加折辱不爲動一日上捕得大鯉戲言直五百金謀所以鬻者彬請以昇瑤促值甚急瑤卽脫妻女簪珥及綈絹服數事

蒲伏而進曰魚有直矣他無所取惟妻女衣裝在焉臣死罪臣死罪上熟睨之曰汝真酸子耶吾無須此亟持歸魚亦不復取直郡有瓊花觀旨取瓊花以觀瑤以帖紙立書此花生於某年爲瑞應至徽欽北轅此種已絕今止存其名耳上默然知瑤之借瓊花以諷也中貴欲選宮女數百人備行在撫臣欲刷之民瑤曰民女不可刷無已臣有一女以進上知其不可動詔罷之及駕旋扈送至淮由淮達徐布袍小帽着雙不借步行露宿奔走承應若奴隸然辛苦萬狀毅然直以身

任而終不忍煩一民民德瑤次骨立祠肖像而祀之兒童走卒至今以蔣公稱乙酉陞副都御史巡撫河南擢掌南京都察院事晉工部尚書加宮保年七十二引年歸居家謝跡公府惟約同好十五人結社於峴山逸老堂其接人惟和氣謙德見之者如坐春風中私居僻處陋巷過其門有不知爲尚書之家者年八十九而薨訃聞賜祭葬仍贈太子太保謚恭靖

都御史胡汝登東臯

胡東臯字汝登餘姚人弘治乙丑進士初授行人歷南

京刑部郎中、先後讞大獄數十、靡不稱平、已而出守寧國、夙夜孜孜、察民所疾苦而亟拯之、在任六年、遷四川按察司副使、已又改威茂兵備、平西番耿勺之亂、進按察使、尋晉都御史、巡撫寧夏、奏築花馬池、賀蘭山邊、墻三百餘里、西北至今賴之、聞弟喪乞歸、再起撫治鄖陽、未幾召還內臺、以抗直忤執政、會太廟災、上疏自劾去、東臯歷仕、與處苟利於人、必身任之、守官餘三十年、田不滿頃、孫文恪陞嘗語人曰、吾姚仕宦而清貧如寒畯者三人、胡中丞東臯、宋中丞冕、胡太僕鐸、時號為姚江三蘆云、

都御史宋孔瞻冕

孫岳附

宋冕字孔瞻、餘姚人、弘治中進士、初官刑部主事、以執法忤逆瑾、矯旨謫、知金谿、瑾誅、復召為禮部主事、敷歷外藩、終撫治鄖陽都御史、冕沉毅有識、外和而中、介所至賑飢、雪枉如救頭、然屢平巨寇、殲其魁、脅從弗問、所活先後數千人、居官三十年、被服如寒士、鄉評重之、孫岳舉進士官、至按察使、

太僕寺卿胡時振鐸

胡鐸字時振，餘姚人。弘治中進士，選庶吉士，入翰林，讀中秘書，尋改給事中。忤逆瑾，出爲河東鹽運司運副。矚然不染，瑾敗，累遷福建督學副使。其教士一以理學爲先，而尤邃於易，所著易說，至與蔡虛齋氏並稱。歷太僕寺卿而卒。鐸平生坦易，無城府，然自守甚介，不可干以私。身歿未幾，子孫至不能舉火。姚人稱爲真道。云。

廣西布政使楊惟德守隅

楊守隅字惟德，守陳之從弟也。登成化甲辰進士第，授工部主事，改兵部車駕司，出按陝西馬政，剗剔宿蠹，百度以貞。轉職方司員外郎，郎中陞江西按察司僉事。時逆瑾弄權，流毒縉紳，有誣人不法事，罪應籍沒者，守隅獨以爲誣而持之。瑾怒，先後罰米四百石，遂奪職以歸。瑾誅，詔起原職。旬宣四川，適流賊麻六等，下上蜀漢間，勢甚猖獗。守隅多方捍禦，西川以寧。陞廣西布政使，懇乞骸骨，再請始得歸。守隅端謹醇厚，性溫而厲，事有不。可則義形於色。比歸，日與諸伯仲觴咏自適，未嘗一跡。城府人尤高之。

濰縣教諭吳慶夔夔

吳夔字夢夔，西安人。由舉人任永春教諭，士頌得師。尋改濰，濰士頌之如永春。弘治甲子，典陝西文衡，得士爲多。吳士沈孟淵卒，不能歛，賻以聘金。鄉人崔巍兄弟道所任，並疾卒，親爲飯含而歸其喪。當道交薦，有曰：「學行俱優，才堪風憲，以耻附逆，瑾不得顯擢，遂乞致仕。」家居，足跡不入城府。僉憲韓邦奇門生也，分巡三衢，龍游胡某者懷數百金遺夔，求釋罪，拒之甚峻。卽露柬，邦奇曰：「嫌疑之際，毋勞枉駕。」二守喬遷，亦門生奉御史檄，訊西安梁宰獄，以二百金遺夔，求囑免，毅然辭謝。其剛介類如此。夔性孝友，母病，疽口，咋其膿。父喪，廬墓，讓兄室，自構草屋以居。風雨不蔽，安之甚恬。郡守沈杰每稱曰：「篤行君子，請總裁郡志，著有享先論，後諸集藏於家。」

湖廣按察副使徐汝容潭

徐潭字汝容，錢塘人。廣南守敏之子也。弘治癸丑進士，歷官南京刑部郎中，秉公守法，請託不行。改工部郎中，時工役繁興，潭爲程其出納，會計詳慎，乾沒者無所容。其奸陞湖廣叅議，秩滿，晉按察司副使。兵備辰沅，時豪貴陶倫罪當死，以千金賂潭，潭却之，持益急。倫懼，走賂

代事者，竟得縱而潭反被深文之名，遂罷歸。囊橐蕭然，居無華屋，出無輿從，性耿介，一毫不苟取，然好義樂施，赴親交之急，輒傾貲與之，雖至空匱弗渝也。

山東叅議徐成之守誠

徐守誠字成之，餘姚人，少刻苦，自樹潛心理學。弘治中登進士，授南京兵部主事，嚴於稽覈，戎伍以清，尋執父喪，廬於墓，有馴虎甘露之異，鄉人名其山曰慈山，服除補刑部，日與四方名士相討論，學益進，嘗陳時政十餘事，多見採納，出爲湖廣僉事，理冤糾墨，不避權勢，遷山東叅議，以疾歸，踰年而卒。守誠孝友廉介，非其義視千駟萬鍾若土，其歷官二十年，室廬僅蔽風雨，有慈山雜著數十條，爲學者所誦。

大理寺司務姜實夫芳

姜芳字實夫，蘭谿人，博學篤行，稱名儒。弘治中領鄉薦，第六，數上公車，不售，謁選授廬陵教諭，正身帥物，懇懇以文章節義爲訓，應聘典試於閩，或有以私求舉者，峻拒之。居父母憂，起教蕭縣，九年考績陞大理寺司務，未幾，逆瑾竊柄，流毒縉紳，芳慨然以不得行其志爲恨，遂

乞休歸。蕭然一室。下楫讀書。微疾能自知。死日具衣冠。端坐而逝。嘗自志其墓曰。吾以媿世之好諛者。

吏科給事中吳子華薨

吳薨字子華。山陰人。弘治中進士。選庶吉士。人翰林。尋拜吏科給事中。剛直敢言。每彈刺大臣及諸貴倖不法事。無所顧忌。朝野肅然。敬憚。嘗以事劾天官卿。天官卿反中傷之。免官歸。環堵蕭然。閉門不出。彈琴讀書。以自娛。嘗過午不炊。適有餽者。謝而笑曰。餓死事小。安敢以身爲溝壑。卒不受。

湖廣按察司副使俞仲才振才

弟振英附

俞振才字仲才。新昌人。弟振英字仲英。成化中相繼登進士。振才初授行人。拜監察御史。凡朝政缺失。必抗章論列。不避權要。兩按川貴。風裁愈勵。宋學士景濂。洪武時謫死夔州。藁葬淺土。振才爲改窆。成都封馬鬣。遷湖廣按察司副使。先是臬司有淫祠。感人胥吏以下。敬祀之。毋敢褻。振才至。立命撤之。羣疑遂解。兩按藩王。獄執法不撓。家居務清約。孝親睦族。急人患難。不以存亡二心。好讀書吟詠。所著有皇華內外臺集。湖南湖湘詩文。

稿新齋集若干卷振英初知安東一日得淮流浮尸衣
夾揚州市繒目振英曰是必有寃遂遣數人分入羣盜
中市繒默察其色號相符者貴買之一人得數縑歸與
目無二索其舟果得餘縑并所掠少女衣物女言亡官
眷屬被害已十口矣獲盜二十餘人皆伏法人稱神明
移官臨淮再補豐城貴溪所至刑清訟簡民德其惠歷
陝西兵備僉事以斬虜功擢尚寶司卿時逆瑾擅權文
武大吏多出其門振英至京或謂曰曾謁劉司禮乎書
刺必謙抑振英再三詰故乃以刺示英英不答出曰吾
老矣不能俛首闔豎遂棄官歸天下高之家居清約如
布衣鄉黨以爲難

兩浙名賢錄卷之三十六終

海國圖志卷之三十六

海國圖志卷之三十六

海國圖志卷之三十六

海國圖志卷之三十六

海國圖志卷之三十六

海國圖志卷之三十六

海國圖志卷之三十六

海國圖志卷之三十六

海國圖志卷之三十六



卷之四